

مشروع الحكايا والتاريخ الشفوي

ورشة المعارف

٢٠٢٠

الحكواتية: ج.د.

السلسلة: التجربة المكانية

التاريخ: 01/12/2020

رقم الأرشيف: 20-TMOH-006

نوع الأرشيف: إستخدام محدود

التجربة المكانية	السلسلة/الموضوع الرئيسي
20-TMOH-006	رقم الأرشيف
للاستخدام المحدود - يجب استشارة الحكواتية قبل استخدام هذه المقابلة لأي غرض ثقافي او بحث	نوع الأرشيف
ج.د.	الحكواتية
21/12/1967	تاريخ ميلاد الحكواتية
01/12/2020	تاريخ ومكان المقابلة
تبدأ ج.د. بسرد ذكريات من طفولتها في المدرسة الداخلية مع مربية صارمة لكن محبة، وتصف رحلاتها إلى روسيا مع الوفد الرسمي كجزء من الفرقة الموسيقية، حيث تمرض وتضطر للبقاء هناك وحدها. ترجع ج.د. إلى لبنان، ويبدأ العدوان الإسرائيلي، ثم تقضي 3 سنوات في دولة شقيقة، داخل حرم مدرسي، بعيدة عن أهلها، وتفترق عن أخوتها. تتزوج من أحد أقاربها المغتربين قبل أن تتمكن من الالتحاق بالجامعة، لتعود وتهاجر مجدداً، إلى دولة إفريقية حيث تلد 5 أولاد، وتشهد على إنقلاب في حين زوجها مسافر، ثم تتعرض للسطو. تنتقل ج.د. للحاق بزوجها في دولة إفريقية أخرى، وتعيش حياة هادئة مع عائلتها، قبل قرارهم بالرجوع إلى لبنان. تخسر ج.د. زوجها بحادثة مفاجئة، وتخوض معارك مع الحياة للإهتمام بأولادها.	ملخص التاريخ الشفوي
مع العديد من الأهواء والإهتمامات الشخصية التي تتمتع بها، حصلت يارا أيوب على شهادتي بكالوريوس، واحدة في الفلسفة والأخرى في التصميم الداخلي. منذ عام 2012، وهي ناشطة وعضوة في العديد من المبادرات والمنظمات غير الحكومية. شاركت في العديد من المنصات الوطنية والدولية وهي الآن المدير التنفيذي لمنظمة "من إلى" غير الحكومية.	معلومات عن الباحثة
زينب الديراني	التفريغ
مربية، أم بديلة، تربية صارمة، فرقة موسيقية، تيفويد، حرب، وفد رسمي، لبنان، روسيا، معسكر شباب عالمي، سينما، مستشفى، بينغبونغ، بيليار، مونوبولي، النط، عاحبله، سنة ال82، عدوان إسرائيلي، مدينة رياضية، بير حسن، الجبل، قصر سرسق، قصف، طيران، عاليه، المدينة التعليمية لأبناء الشهداء، مطار لبنان، غربة، أميركا، كندا، أستراليا، فرنسا، النمسا، سويسرا، ألمانيا، بريفيه، منظمة التحرير، سنة ال87، فنلندا، خطوبة، جامعة، معهد، محاسبة، أفريقيا، زواج، جيران، براءة، صداقة، بغاء، فرنسي، إنكليزي، حمل، مالاريا، عثي، كبة العدس، مفتقة، ولادة، طلق، تجارة، إنقلاب، حرب، قواص، سرقة، سلاح، نوكيا [Nokia]، مدارس فرنسية، عيلة، نظام عسكري، تدير البيت، مشروع زراعي، موت مفاجئ، قروض، بنك، شركة تأمين، جامعة، صيد عصافير، صحة عامة، إدارة أعمال، أمومة	الكلمات الدلالية

Rights of Ownership for the Storytelling and Oral History Project

The Knowledge Workshop holds full or co-ownership of all items that it archives and publishes. Recordings published on the Knowledge Workshop website can be used only for cultural, educational and non-profit purposes, and never for commercial purposes.

To use the material on our website, including the oral histories and their related images, we ask that you always reference the Knowledge Workshop with: Storyteller's name, interviewed by Researcher's name, Date, The Storytelling and Oral History Project, the Knowledge Workshop, Beirut, Lebanon, page number. [Ex. Nazik Saba Yared, interviewed by Deema Kaedbey, 2017, The Storytelling and Oral History Project, the Knowledge Workshop, Beirut, Lebanon, pp 12.]

To use the limited-use items held within the Knowledge Workshop, you can visit our office in Furn El Chebbak and fill out a permission form. You can use these items inside the Knowledge Workshop space, but we request that you consult with us on which items you can use. Some of these items require permission from the storytellers before being used.

حقوق ملكية لمشروع الحكايا والتاريخ الشفوي

لورشة المعارف ملكية تامة أو مشتركة للمواد التي تؤرشفها وتنشرها. التاريخ الشفوي المنشور على الصفحة الالكترونية لورشة المعارف يمكن استعمالها فقط لأهداف ثقافية وتثقيفية لا تبغى الربح، ولا يمكن استعمالها لأهداف تجارية تبغى الربح.

لاستعمال المواد على صفحتنا الالكترونية، من ضمنها التاريخ الشفوي والصور المرافقة نطلب منكم التنويه بورشة المعارف كمرجع باستعمال: اسم الحكواتية، قابلتها اسم الباحثة، السنة، مشروع الحكايا والتاريخ الشفوي، ورشة المعارف، بيروت، لبنان، الصفحة. [مثلاً: نازك سابا يارد، قابلتها ديمة قائدبيه، ٢٠١٧، مشروع الحكايا والتاريخ الشفوي، ورشة المعارف، بيروت، لبنان، ص. ١٢]

لاستعمال المواد المحددة الاستعمال الموجودة في ورشة المعارف (الغير متاحة على صفحتنا)، يمكنكم القدوم الى مكتبنا في فرن الشباك وتعبئة استمارة الطلب. بالإمكان استعمال هذه الموارد داخل ورشة المعارف، لكن نسألكم ان تستشيرونا عن أي مواد يمكن استعمالها. بعض هذه المواد تتطلب طلب من الحكواتيات قبل استعمالها.

يارا أيوب: اليوم 1 كانون الأول 2020، الساعة 8:20، الجزء الثاني من المقابلة مع ج.د.، حنبش مطرح ما كملنا هيدك المرة، كنتي آخر فكرة عم نحكي فيها وقتا كنتي بدار الأيتام، وكيف كانت المربية عم تتعاطى معن، وكيف كان الجو، بتحبي نكمل من هون؟

ج.د.: [00:00:34] أكيد

ي.أ.: تفضلي.

ج.د.: [00:00:41] [تأخذ نفس عميق]، مثل ما حكيت، إنو، كانت المربية، بشكل عام، كانت كثير دقيقة بحياتها، بتنظيم حياتنا، بنومنا، بالأكل اللي إنا، كل شي كان على نظام معين، على وتيرة معينة، كانت صارمة، لأنو بدها إنو يكونوا ولادها، معتبرة إنو هيدول ولادها، الأفضل. كان إلهار هبة، كنا نخاف منها، لأنو كانت كثير هي نظامية، كانت كثير بتحب لانظام، فكنا نحسب حسابها، يعني نعتل هم نغلط أو شي، مشان ما نتعاقب، أو مشان ما نسمع شي، بس يعني هي، فعلا، فعلا، كانت أكثر من أم بديلة، للأمانة، لأنو إشتغلنا بكل ضمير، ويكل محبة معنا، نحن، العيل اللي كانت هي مسؤولة عننا. وكانت، رغم الصرامة اللي إلهار، بس هي كانت بتحبنا، ونحن هيدا الشئ، ما نحن، نحن وصغار، ما كنا منعرف هيدا الشئ، نحن منعرف إنو "هي ليه كانت تكون هي، هالقد قاسية معنا؟ ليه هالقد بتضلها ورانا بكل شي، تراقبنا بكل شي؟"، ف، فربينا وكبرنا بهيدي المدرسة، وكنا كثير نساfer، نساfer لبرا، نمثل، ممم، نمثل، يعني، كنا، يعني كان أنا ولا خيي، كنا بالفرقة الموسيقية، كنا بالديكة، كنا كمان بنشاط الأغاني، فكنا نساfer كثير، وسفارات كانت كثير حلوة، ممم، وتصير عنا أحداث كثير حلوة صراحة، وفي إشي كمان تكون محزنة، يعني أنا بذكر أول سفرة سافرت فيها، كان عمري 9 سنين، صخنت هونيك، صار عندي تيفويد، وأكيدة هيدي من نتاج الحرب اللي حكينا عنه، فأنا دخلت مستشفى هونيك، وبتعرفي، لأنه وفد رسمي وهيك، كان في كثير إهتمام كبير فينا، وفي أنا كمريضة، إنتقلت من مستشفىين أو ثلاثة، نقلوني، وكان في مترجمة تجي تطلّ علي، وحتى هتي، الوفد، يجوا، يعني كان خيي ولا هيئة الإدارة، يجوا يطولوا علي، لحين هني صار وقت إنو هني صار لازم يرجعوا علبنان، أنا رفضوا إنو يرجعوني، لأنو أنا كنت بعدني مني شفيانة، كان بعدني مريضة، فبذكر الموقف اللي أخذوني فيه بالأمبلانس [ambulance]، أخذوني بالأمبلانس، لحتى ودّعهم، كثير ببتذكر هيدا المشهد، وكثير كان موجه لألي، لأنو أنا ما سمحولي ودّع خيي، هو كان عن بعيد، واقف هيك حد الحيط، يتطلع فيني ويبيكي، وأنا إتطلع فيه وإبيكي، ما كان مسموح لحدا يقرب لعندي، ودعتهم عن بعيد، وسافروا، عم تتخايلي قديش كنت أنا عم عيش الخوف والرهبه؟، إنو أنا عمري 9 سنين، وحدي بالمستشفى، هي بس المترجمة اللي بتطل علي، بتجلي أكيد هدايا معها، بس باقي الوقت أنا لوحدي، مع الروس، هني كنا بروسيا بوقتها، مع الممرضات، من التريكس [tricks] اللي كنت أعملها مثلا عشان صح وإرجع علبنان، كنت، سألت مرة المسؤولة، المربية، اللي كانت معنا بالوفد، بوقتها سألتها "قديش درجة الحرارة الطبيعية؟"، فكانت قالتلي هي بوقتها، ببتذكر، إنو 36.5، فأنا، بتعرفي، مريض تيفويد، أكيد حرارته بتكون طالعة، بال40 و فوق، فلما تجي الممرضة الروسية تحطلي ميزان الحرارة، تحطه وتروح عشان تكفي للباقيين، وترجع لعندي، فأنا شو أعمل؟، شيل ميزان الحرارة، هيدا عمري 9 سنين، شيل ميزان الحرارة، نفضه، نفضه، نفضه منيح، لبيصير 36.5، وحطه تحت باطي، بس ضهّره لبرا، يعني وين في الراس تبعوله ضهّره لبرا، عشان تضلها الحرارة 36.5، فكان بس تجي الممرضة وتحمل الميزان، تطلع فيه، "بييه" تسأل حالها كيف هيك؟، تسطعني، مثل النار، تطلع بالميزان، تسي، تروح تجيب غيره، ترجع تحطلي ياه، يعطولها، إرجع أعمل نفس الحركة [تضحك]، وحطه، تقعد تحكي، تبرس بالروسي، ما إفهم عليها شو عم تحكي،

[00:05:41] لمرة حكيتني، يمكن بالروسي، قالتلي "أنا باقية عندك هون"، حطتلي ميزان الحرارة، وضلت واقفة حدي [تضحك]. كنت بالليل كثير خاف إنو أنا موت ببلد غريب، ما بعرف حدا، بذكر كانوا جايينلي لعبة كبيرة، هي المترجمة جابتلي لعبة كبيرة، كنت أحضنها بالليل، أعبطها وإبيكي، إبيكي إنو أنا خيفانة إنو أنا موت هون، أهلي منهن هون، ما عندي حدا هون، فكانت تجربة صعبة، صراحة، وبقيت هونيك لوقت ما شفيت، بعد ما شفيت بعنوني على لبنان، من حظي التمس، السفرة الثانية، بعد سنة، سافرت كمان عروسيا، كمان صار عندي، صخنت كمان، مرضت مرة ثانية، هيدي المرة كانت مثل ردة فعل على التيفويد اللي كنت عاملته، دخلوني كمان مستشفى مرة ثانية، كان هو بوقتها في، مثل معسكر للشبيبة العالمي، بيجتمعوا من كل الدول، كل دول العالم، بعملولهن نشاطات، وسباحة، وإشي كثير حلوة كانت، إشي ترفيهية، فأنا بذكر إنو المنطقة، الضيعة اللي كنا فيها نحن، اللي عاملين فيها هيدي البيوت، لكل الوفود يعني، كان في هيدي الضيعة، وبذكر مرة أخذونا نحضر سينما بمنطقة ثانية، فنحن رحنا مثل كيف كشاف يعني، قطعنا المسافة من هيدي الضيعة لهيدا المكان، اللي كان هو حرش، وعاملين فيه سينما كبيرة، وحضرونا بوقتها فيلم، ورجعنا، فأنا لما مرضت، أخذوني عمستشفى، هيدي المستشفى كان فيها إنو الواحد بعد الظهر، كان حدا في حرش يعني، واللي هو طلع الحرش نفسه اللي نحن حضرنا فيه السينما، فكان نحن بعد الظهر،

بحقلنا نحن المرضى، نزل نقعد، في كان مقاعد حجر، نقعد نتسلى تحت، لحد الغروب، حد الغروب منطلع نحن على غرفنا، فانا تطلعت هيك، قلت هيدا الحرش مش غريب عليي، تذكرت إنو هيدا الحرش نحن اللي حضرنا فيه السينما، [تضحك] فعملت شغلة، خططت إنو إهرب، فيوم من الإيام، قاعدة أنا كنت تحت، خلبت لكل المرضى طلعوا، شلت المصل من إيدي، ولايسة بيجاما، وقطعت هيدا الحرش كله ركض، إركض وإتطلع وراي إذا حدا لاحقني، إركض وإتطلع وراي إذا حدا لاحقني، قطعت ضيعة، يعني هني في محل ما كانوا رفقاتي، بينها وبين الحرش في ضيعة بعد، رحت قطعت هيدي الضيعة عم بركض، والناس كلها تطلع فيي، لايسة بيجاما وعم بركض، ليش عم بركض وتطلع حواليي؟، ظلهن يتطلعوا فيي إنو شو إشيها هيدي، لما وصلت على المكان اللي فيه الوفد اللي إنا، كانوا مجتمعين عم يعملوا نشاط، وكان مدير المدرسة كمان معهن، تطلع فيي عهيك، قلّي "إنت مين جابك؟"، قلته أنا لحالي، قال "كيف جيتي؟"، قلته جيت مشي، "إنو كيف عرفتي؟"، قلته عرفت. قلّي "من محل ما جيتي بك ترجي" [تضحك] رجعوا رجعوني عالمستشفى، ما تتخايلي الإستنفار اللي كان بالمستشفى، لأن نحن كنا وفد رسمي، ووفد رسمي يعني مسؤولية كبيرة عليهم، إنو إذا حدا إنخطف، حدا صرله شي، مشكلة كبيرة، فكانت قائمة قاعدة المستشفى، عم بدوروا عليي، وما عم يلاقوني، فلما طلعت لفوق، طلعتونى لفوق، يسألوني، الحكيم، إجي الحكيم، والمرضات "إنت كيف رحتي؟"، قلته أنا ما بفهم فرنس--، أعملهن بإيدي هيك [تحرك يدها: لا]، إنو أنا ما بحكي روسي. يحكوا معي إنكليزي، قلهن ما بحكي إنكليزي [تضحك]، فصاروا لما كنت بدي إنزل إرجع على المقعد لأقعد بعد الظهر، يحطوا حدي ممرضة، هالقد كانت القصة. وحلوة كانت المستشفى عندهن، لأنو من المستشفيات اللي رحلتها، في مستشفى مثلا، فيه صالة فيها بتلعبى بينغبونغ [pingpong]، ممم، في بتلعبى بيليار [pool]، في إشي مونوبولي [monopoly] وهيك إشي، فمستشفياتهن كانت حلوة، فيها إشيا ترفيحية يعني، بس الصعب إنو نحن صغار بعدنا، وببلد غريبة، وتجي تحبسي، يعني، مريضة، تتحطي بنستشفى، كان كثير صعبة القصة. كمان هيدي من الشغلات اللي صارت معي [تضحك] بروسيا ثاني مرة، [00:10:41] بسفراتنا كان في إشي حلوة تصوير، ذكريات كثير حلوة كانت، وحتى على المسرح، لما نكون عم نغني، كمان في أحداث تصوير معنا مضحكة، ما بعرف يعني، ما فيي إسرد كل شي، لأنو بصير الوقت كثير طويل، ممم، لحين صارت 82، أو 88، من ال82، بذكر كنت أنا، المدرب عم يدربني على الحيلة، عركات بالنط عالحيلة، كنت عم بتدرب أنا وياه، وسمعت صوت طيران، صوت طيران، ف، تخبيبت أنا ورا الشجرة، بوقتها كان صار عم ببلش العدو الإسرائيلي، عم ببلش يقصف بالمدينة الرياضية، ونحن كنا عبير حسن، كنا قريبين، فدغري قررت المدرسة إنو كل الطلاب مع الكوادر الأمهات البديلة، مع المعلمين، مع كل الإدارة، كلنا ننطلق، وطلعونا، هربونا عاجل، وبذكر قعدونا بقصر سرسق وقتها، قعدنا، وكلنا نسمع القصف، ونشوف الطيران كيف عم يمرق ليقصف، وهالقصص هيدي، لحين صار يضرب، ما بعرف، يمكن قريب ل عاليه، والله ما بعرف، ما بذكر يعني وين، رجعوا هربونا وأخذونا على دولة شقيقة، حطونا هونيك، وكنا هونيك بمدرسة إسمها المدينة التعليمية لأبناء الشهداء، بوقتها، كان فيها 3 مدارس، يعني غير مدرستنا نحن اللي فيها 90 طالب، كان في مدرستين ثانيين كبار، هيدي المدينة كانت عنجد مدينة، لأنو فيها مباني كبيرة، وفيها مجارس، وفيها مطعم، وفيها شوارع كبيرة، بتمرق فيها سيارات بكل سهولة، وفيها أراضي، وفيها ملعب دولي، فيها كل شي، بس هي-- فيها سور كبير، ما في الواحد يضهر لأنه في حرس على المدخل بالمدينة هيدي. عشنا هونيك، ودرسنا هونيك 3 سنين تقريبا، كمان كانت تجربة حلوة من ميل، وتجربة شوي مزعجة من ميل، إنك إنت بعيدة عم بلدك، بعيدة عن قرايبك اللي هني إلهن بالعادة يطلوا عليكى كل جمعة، تشوفين، هيك، تتونسي فيهن، تروحي لعندهن وقت العطلة، هيدي القصص ما عادت موجودة، لأنو نحن صرنا ببلد ثاني، من الإشي المحزنة إنو مرة كان نحن عنا سفرة، سافرنا فيها، ونحن وراجعين، عملت الطائرة إسكال بلبنان، بمطار لبنان، فتخايلي إنت قديش صعبة، إنك إنت بعيدة عن أهلك صرلك سنتين مثلا، منك شابيتهن، ووصلتني بالأراضي اللبنانية، عالمطار، بقلب الطائرة، مش مسموح تنزلي، ولا حتقدي تشوفي أهلك، فكانت كثير صعبة عليي، أنا بكييت كثير بوقتنا، إنو أنا صرت بلبنان وما قدراني شوف حدا من اللي بحبهن، ف، تجربة كانت محزنة صراحة، ممم، كنت كثير حب السبور [sports]، كثير حب أسمع موسيقى، كثير حب إقرى شيكسبير [Shakespeare]، كنت عاملة عالم لألي لحالي، خاص فيي، يمكن ما كثير قطعت بهيدا سن المراهقة اللي مع البنات، والمشغبة، سن السئلة يعني، وهيدي الأغلاط اللي كثير بيعملها الواحد وهيك، أنا ما بحس حالي قطعت فيهن أبدا، ليه؟، لأنو كنت كثير، يعني، كإنسانة، حريصة إنو ما حدا يزعجني بكلمة، أو حدا يأذيني بكلمة، من خلال أي تصرف أنا بقوم فيه، لهيك، أنا ما كنت شارك البنات بمشا--، بالإشي التخريبية اللي بيعملوها، وهيك، لأ، أنا كنت عاملة عالم لألي، خاص، بس خلص مدرستي، وإتعدا، وننتسح، ننام شوي، بعد الظهر في عنا وقت نحن ننزل نلعب بالملاعب، مع رفقاتنا، وهيك، كنت أنا عبي وقتي، يا أعمل سبور، يا أسمع موسيقى، يا إقرأ، ف، نتاج هيدا الشوي، كان كل شهر التقييم للبنات، كلهن يعملهن إجتماع المدير،

[00:15:41] كل وحدة يكون عندها مشاكل، أكيدة، يعني يكون في شكاي عليها على مدى الشهر، يكون كلّه مدون عنده، وكان يعمل إجتماع شهري، وكل وحدة يحاسبها على الأخطاء اللي عم تعملها، الوحيدة اللي كنت أفند بيناتهن هو أنا، كل مرة، كل مرة، يقلهن "يا عمي هيدي البنات، هيدي منها بنت مثلكن؟، طب هيدي ليه ما بيجي عليها شكاي، وإنتوا بيجي عليكم

شكاوى؟"، اللي إكتشفته بعدين، بس كبرنا وإلتقينا بعد، يعني بدي إحككي من شي 3 سنين تقريبا، لأنو نحن بعد ما كبرنا وكل حدا تجوز، كثير منهن سافروا، شي ع أميركا، وشي ع كندا، شي ع فرنسا، شي ع ألمانيا، شي ع سويسرا، شي ع ألمانيا، يعني توّرّ عوا بكلّ البلاد، اللي فهمته بعد ما إلتقينا، بعد هيدا العمر، إنو هتي كانوا ينقروا منّي، إنو هيدي --"ليش هيدي بتضلها أحسن منّا؟" وليش هيدي بضلّ يحكي بالمنح عنها المدير؟"، وبمطرح معينة، في منهن حتى قالولي يمكن "كنا نفكر إنك إنتي تتصنعي هيك، إنك تكوني عاقلة يعني، بس الحقيقة إنو نحن حتى هلق لما شفناكي، حسيناكي قديش إنت هيدي الإنسانية الهادية، العاقلة، بعدك مثل زمان، ما تغيّرتي"، بقيت هونيك 3 سنين، أكيدة لقينا صعوبات كثير بالدراسة، لأنو منهاج كليا مختلف، وأكثر الإشيا بالعربي كانت، فأول سنة إيه، أول كم شهر كانوا صعبين، وبعين مشي الحال، وصرت أنا، مثل ما بقولوا، أطلع الأولة عصقي، وبدون منازع، فخلصت البريفيه، هونيك، وقرروا إنو يرجعوا ببعوتنا علبنان، أنا وصديقتي، اللي نحن أكبر سنّا يعني، ببعوتنا علبنان، وعأساس إنو المدرسة ترجع علبنان من أول وجديد، مع طلابها وكل الكوادر اللي فيها، بس بهيدي المرحلة، نحن، أنا ورفيقتي نزل، نقعد عند أهلاتنا، والمدرسة بتصرف علينا كل مصاريفنا ودراستنا، لحين يصير الوقت اللي بتنتقل كل المدرسة على لبنان، عبير حسن، ننضم لأخواننا ورفقاتنا، المشكل هون إنو في --بدون ذكر أسماء أكيد، في جمعية هون بلبنان، ممم، إستولت على المدرسة اللي إنا، وأخذتها، وحطت فيها ذوي الحاجات الخاصة والمعاقين، ما عادت سلّمت المدرسة ل--ل-للإدارة اللي إنا، فصار من الإستحالة إنو يرجعوا الطلاب على لبنان، فكفّوا الطلاب هونيك، إخواني كانوا هونيك، شي إجا منهن --خيي إلتحق فيني هون، ترك المدرسة، وصار يشتغل، خيي الثاني بقي هونيك، عندي خيي الصغير كمان، ممم، هو بالمبدأ، لما أخذونا على هيدي الدولة، كانوا مقررين ياخذونا عدولة ثانية كمان، ممم، أخذوا القسم الصغار، من الأولاد، وعأساس نحن نلتحق فيهن، صار في شرح سياسي بين، بين منظمة التحرير وبين الدولة هيدي، فما عدنا قدرنا نحن نروح لعند إخواننا، ولا إخواننا قدروا يرجعوا لعنا، ممم، بال87، أو بال86، أنا شوي ناسية يعني، صار عنا سفرة على فنلندا، سافرنا على فنلندا، وأنا كنت، إيه، أنا عملت السيغوند [10 grade] بلبنان رجعت، وكان معانة بالنسبة لألي، وكان كثير، كان مثل ما بقولوا صدمة لألي، لأنو غبت أنا 3 سنين عن لبنان، ورجعت، فتغيّر كثير المنهاج علي، وصار كلّ بالEnglish، وكانت المدرسة اللي إلتحقت فيها قوية كثير، وممنوع نحكي بالعربي، أو نسأل بالعربي، وحتى الأستاذ اللي كان يدرّس رياضيات، كمان ما كان يفهم، مش بس أنا، يعني حتى كل الصف كانوا ما يفهموا عليه، وكان أنا طموحي إنو أعمل دكتور، فكثير عزت علي إنو أنا ما عم بقدر إفهم منيح الدروس، لدرجة إنو كل يوم أنا بس إجي بالمدرسة كون عم إبيكي، [00:20:41] وما في حدا يساعدني، يعني حتى إنو حدا يساعدني، يقويني بالدراسة، ما في، ما كان عندي حدا إنو يساعدني، وهيدي كانت عنجد صدمة بالنسبة لألي، لأنو عم تحذلي من الطموح اللي أنا كنت عم بطمحه، بوقتها أخذت قرار إنو أنا لازم إنقل من العلمي للأدبي، لأنو أنا ما قدرانة كمل، أو لقينتها صعبة علي، إنو أنا ما كون بمطرح مش شاطرة فيه، فبنص السنة تقريبا، رحنا للإدارة وطلبت من الناظر إنو أنا بدي إقلب للأدبي، فقلّي إنو "متأكدة إنت من قرارك؟ قطعتي إنت مرحلة بالدراسة يعني"، قلته "أنا متأكدة، لأنو أنا ما عاد قدرانة كمل هيك، ما في حدا عم يساعدني، إحترم هيدا القرار، وكملت بالأدبي، مع إنو أنا الأدبي ما بحبه صراحة، كملت فيه، والحمدالله، ممم، قطعت، وصارت تجي علاماتي منيحة، بدون ما حدا يساعدني. خلّصت سيغوند، ما سقطت، وخلصت باك [1]، جينا للتيرمينال، عطت قرار الدولة اللبنانية إنو ما تحتمل إمتحانات حكومية، تحططي إفادات مدرسية، هون أنا وقفت عندها للقصة، قلت أنا ما بدي أخذ إفادة مدرسية، أنا بدي أخذ شهادة حكومية، رجعت قررت إنقل ع هيدي الدولة الثانية، محل ما بعدها مدرستي الثانية، إرجع إدرس من أول وجديد، بعد غياب سنتين عن هيدي الدولة، إرجع إدرس منهاج التيرمينال تبعولهن، وهيدا اللي صار، درست تيرمينال، وأكيدة كان في صعوبة، في تعب كان، لأنو تغيّر علي رجع المنهاج من أول وجديد، لكن الحمدالله إمتحنت ونجحت، وأخذت شهادتي، ورجعت علبنان كرمال سجل بالجامعة. بهيدي الصيفية، صار عنا سفرة عفنلندا، سافرنا، سافرنا ل15 يوم، ونحن هونيك، الفنلندية سألونا بوقتها "إنتوا شو في عندكن أمنية نحققكن ياها؟"، ف، كأنا كنا متفقين كلنا مع بعض، مع إنو نحن مش جايين أيّ سيرة، أو مش متفقين حتى بخصوص هيدا الموضوع، ما حدا متفق مع الثاني، كلنا صرخنا "حايين نشوف إخواننا"، لأنو كان صرلنا 3 سنين مش شايين إخواننا الصغار، ف، بوقتها بذكر منظمة التحرير خلال 48 ساعة عملت باسبورات لأخواننا، وسفرتلنا ياهن عفنلندا، لقتينا فيهن هونيك، وقضينا كم يوم هونيك نحن وياهن، وبتذكر كثير منيح، خيي، يعني، كان في عنده نشاطات، لأنو هونيك بيعملوا نشاطات ترفيهية لأنا، بياخذونا بفرجوننا على الإشيا الأثرية اللي عندهن، وكل شي بيخص بالبلد، يعني عاملين program كامل، من الصبح لعشية، بكون عندك إنت بروغرامات كاملة، ف، كنت قله لخبي "حبيبي، روح معهن مشان تنفّج، تغيّر جو، تتعرف" وهيك، يقلي "لأ، أنا بدي ضلني قاعد حدك"، [رد] "يا حياتي ليش يا خيي؟"، بقلي "ما أنا هلق فرصة شوفك، يمكن بعدين ما إقدر شوفك"، هي كانت تبكي، تبكي هيدي القصة، وكانت كثير صعبة إنو بس خلّصت ال--، خلّص وقت الإقامة بتبعيننا بفنلندا، إنو هني يرجعوا على البلد اللي هني مقيمين فيها، ونحن نرجع لهون، إفترقنا، رجعت، وعلى أساس إنو أنا بدي إدخل جامعة، عم جهّز وراقي، طبعا أكيدة بديّ عادل الشهادات تبعيتي، لأنو بدك تفوتني عالجامعة وإنت شهادتك مش من لبنان، بدك تصادقها وتعملها، بهيدا الوقت، إجي قريبي، كان بالسفر، وكان صايرله زمان، من أنا

وصغيرة يعني، مسافر، وأنا ما بعرفه، يعني، لأنو كنت صغيرة لما مسافر، وبالصدفة يعني، عم يزور أهلاتي، اللي هني بيت عمي، اللي أنا قاعدة عندهن، وشافني، وقرر إنو يكون في شي بيناتنا،

[00:25:41] فخطبنا، خطبت تقريبا شي 10 أشهر تقريبا، هيدا الوقت، قلي المدير إنو، بما إنو خطبت وكتبت كتابي كمان، فسألني، قلي إنو "إذا بدك تقوتي جامعة، بالمنطق، خطيبك ما حيرضى إنك تضلك 3 سنين، 4 سنين بلبنان، فبدك تدوري على شي، إنك إنت تقدري تعمله خلال هيدي السنة، وبنفس الوقت تقدري تفيديه فيه إذا رحتي لعنده لهونيك"، فدورت، ودخلت معهد، عملت محاسبة لسنة، بس هيدي السنة كانت هيك، مثل ما بقولوا، عبثية يعني، ما كثير عولت عليها لأنو أنا مسافرة، وسافرت، سافرت لهونيك، على أفريقيا، وتزوجت. ممم، أكيد كل شي كان غريب علي، أنا تلميذة، بعدي ما بعرف أعمل شي، حتى الحياة يعني، منو جوي، منو جوي لأنه كل جبراني أكبر مني بالسن، وكلهن فكريا غير عني أنا، بحس حالي كنت بعدي هيك طفلة، هيدي البراءة اللي عندي، جاي من مدرسة، يعني هيدا الواقع تبع المرأة المتزوجة اللي عندها مسؤوليات وهالمواضيع، في شي كثير كثير تغير، تحول كثير كبير بحياتي، ممم، وكان كثير هيدي ال-- بعدي، مثل ما بقولوا، عالفطرة. أحيانا يجوا يزوروني الجارات وهيك، يتحدثوا بمواضيع، ويحكوا إشي، أنا أوقات ما إفهم، [تضحك] فأنا إحفظهن براسي، بس يجي جوزي، إساله "يعني شو معنى هيدي؟" قالوا هيك، شو معنى هيدي؟"، يصير يضحك هو، يفهمني ياهن، لهالقد كنت أنا جد كثير كثير هيك، بعدي على الفطرة، وعلى هيدي البراءة تبعيت الطفلة اللي جواتي، بس الحمدالله، كل جبراني كانوا كثير مناح، وحصنوني، وفي منهن أكبر مني بمنيح، فاهتموا هيك في، داروا بالهن علي، وهيدي نعمة الحمدالله، وشو بدي خبر، ممم، هونيك بس تروحي عأفريقيا، بس تروحي، أول ما بتروحي جديد، كل ما تشوفي حدن، بتفكري إنو هيدا هو الشخص نفسه اللي شفتيه قبل شوي، من المفارقات اللي صارت معي يعني، كل ما شوف حد أفريقي، فكره إنو هو نفسه اللي شافيتيه قبل، [تضحك]، ما كان-- الإنسان بس يروح على أفريقيا ما بميز، إنو بالشبه، أو إنو هيدا بيختلف عن الثاني، لأ، كنت فكرهن كلهن نفس الشخص، ممم، كان وقت عندي، يعني، كان في عندي وقت طويل، وقت طويل، لقلك، مرتاحة كنت، ما عندي هيدي المسؤوليات، الأولاد، وسهر وهيك، ولا عندي حتى شغل، إنو قاعدة بالبيت، بس كثير فقدت للبنان، كثير فقدت لأصحابي، كثير فقدت لأهلي، كانت عنجد صعبة كثير، خاصة إنو أنا لوحدي بالبيت، كثير كنت لاقى صعوبة، أوقات كثير إبكي، إشتاق للبنان، إشتاق لأهلي، إشتاق لرفقاتي، إشتاق لرفيقتي اللي كنت أنا وياها نفس المقعد، بقينا 6 سنين عنفس المقعد أنا وياها، إبكي، إبكي عشانها، صدقاً، إبكي عشانها، وإتمنى ياريت لو بتجي لعندي، تسكن معي، لحتى إنو كمل هيدي الحياة أنا وياها، لدرجة مرة قلته لزوجي [تضحك]، قلته "إنت بتحيني؟"، قلي "أكيد بحبك"، قلته "طب إذا طلبت طلب بتتفدلي ياه؟"، قلي "شو؟"، قلته "فيك تجبلي رفيقتي؟ تجوزها، أنا يقبل تجوزها، بس تقعد معي بالبيت" [تضحك]، تطلع في هيك، تطلع هيك، إنصدم هو، ويله به يضحك، وويله مصدوم، قلي "إنت عم تحكي عنجد؟"، أنا صرت إبكي، قلته "إيه، أنا عم بحكي عنجد، أنا كثير إشتقتها، ما عارفة إقعد بلاها"، فصار يضحك، قلي "إنت عنجد مجنونة". كان عندي ببغاء، كنت أتسلى فيه كثير، كان يضل يرافقتي، بقعد معي، إشرب نيسكافيه شربه معي،

[00:30:41] أكل تفاح، يقعد حدي هيك، حد كنفني، طعميه تفاح معي، ممم، كان في تحت البيت، يعني الفرندا تبعيتي، كان في الأفارقة، اللي هني أصحاب الملك، ساكنين هني تحت، بتشوفي الباحة تبعيتهن إذا وفتي عالفرندا، من جوا يعني، مش من برا، مش برنذا الشارع، البرندا الثانية اللي هي تبعيت الدرج، كنت سلم عليهن، الصبح هيك، كان في ولد صغير كنت كثير حبه، س--، قلهن طلعلولي ياه، هيك، إحملة، بوسه، لعبه، فصار في هيدي العلاقة الوطيدة، مع إنو أنا مش كثير بحكي فرنسي، يعني، ما كنت أعرف إحكي فرنسي، بس إنو إحكي شوي بالإنكليزي، سلم عليهن، يعني يفهموا، يعرفوا إنو أنا بحبهن، لدرجة إنو، عندي جبراني كان، البنابة كانت مبنى من طابقين، كان جبراني اللي فوق واللي تحت، يلي بيوقع من ألعاب ولادهن لتحت، كانوا ياخذوها الأفارقة، ما يرجعولن ياه، فأنا صرت الوسيط، بعلاقتي الحلوة الطيبة معهن، صرت أنا الوسيط، [تضحك] إذا وقع شي لعندهن، يطلعلولي ياه لألي، وأنا أعطيه للجبران، وبعدين صار في عندي حمل ببنتي، أكيد أول حمل، ضربتي مالاريا قوية، روت أول بيبي، بأول الحمل، وبعدين صرت حامل بالثاني، هيدي الفترة، شو كانوا يقولولي جبراني؟ "ولك، حاج تلعبى هالولد، حاج تطلعي فيه، بكر ابيطلع الولد لونه مثله، أفريقي"، وما بعرف شو [تضحك]، بتعرفي هالعقلية هيدي تبعيت-- أنا ما إسال، ف، بذكر لما إجت بنتي الأولى، بتعرفي، شي جديد علي بدي إهتم فيه، عانيت بالحمل، ضربتني المالاريا، وكنت حأخسر ال-- حأخسر بنتي يعني، من وراها، وكان حملي شوي صعب قبل كمان، يعني خلال الحمل عانيت أول 3 أشهر كثير، وبعدين بالخامس كنت حأفقدوها لأنو ضربتني كثير مالاريا قوية، دخلت مستشفى بوقتها، وكان سلامتها من الله، يعني نجيت، مشي الحال، فلما خلقت بذكر ما عدت كثير إقدر إهتم بالببغاء، فهو حرد، وزت حاله عن الفرندا بوقتها، ما عاد قبل ياكل من حدن بذكر، ما عاد يقبل ياكل ولا يشرب، وزت حاله عن الفرندا، وانجرح، إنجرح صدره، رجعوا طلعه، صرت حطته مرهم، ودوا، وهيك، ويجربوا يطعموه، ما كان يقبل، وحتى أنا، كنت جرب إنو طعميه، كأنو زعلان مني، ما كان يقبل، ورجع زت حاله مرة ثانية ومات. هون أنا كان كثير صعب الموضوع علي، إنو أنا فقدت الشى اللي بحبه، فتخايلي قديه بتحبي إنت بنتك، قديه إنت مبسوطه فيها، بس أنا صرت حط اللوم عليها، إطلع فيها وقول بقلبي، إبكي، وقول بقلبي "كله كرمالك إنت، كوكو

راح، كوكو مات"، هيك إحكياها، بس ما إسترجي إحكي بصوت عالي، قول بقلبي، إتطلع فيها وقلها "كله كرمالك إنت كوكو مات"، فقد ما بكيت بذكر [تضحك]، سلفي وزوجي يقولولي شو؟ "ناخذُه لندفنه؟ بدك نعمله مدفن لألو؟"، صاروا يتمسخوا علي، من هيك أنا ما كثير إلي قلب ربي حيوانات، من وقت هيدي القصة، ما عدت حب إنو إتعلق بحيوان، لأنو كثير صعوبة عندي إنو إفقده، ممم، كبرت بتوتي، ورجعت جيت بنتي الثانية كمان، وكانوا تقريبا ورا بعض، في سنة وشوي بيناتهن، ممم، صرت، إلهيت، يعني إنسجمت بالجو هونيك، تأقلمت، صار عالمي هونيك، أصدقائي هونيك، حياتي هونيك، ممم، صار في مسؤولية، بس أكيدة تانت، اللي بدي قوله إنو، إن كان أول ما تزوجت، يعني، من أول ما تزوجت، كان عندي بالبيت عشي، يعني أنا ما كنت بحاجة إنو حتى أعمل أكل، يعني زوجي كان، وخيو، سلفي بالبيت، بس أنا مني بحاجة أعمل أكل لأنو العشي اللي عنا بيعمل كل الأكل، وكان هو اللي يشرف عليهم قبل ما أنا أوصل، لكن أنا بس رحنت، قلت أنا لازم أتعلم، [00:35:41] ما بصير إنو هو يعمل أكل وأنا ست البيت موجودة، أنا شو دوري؟، فأنا صرت جرب أعمل أكل [تضحك]، وجرب فيهن، مساكين يا حرام شو كانوا ياكلوا أكالات [تضحك]، قول أنا لأ، أنا بدي أعملها لوحدي، حتى ما رح أسئله لألو، أنا بدي أعملها، جرب، من الأكالات اللي صدمتهن فيها كبة العدس مثلا، قلت أنا بدي أعمل كبة عدس، أنا ولا مرة عاملة أكل، رحنت جيت العدس وسلفته، هيدا البني، وعم بعمله، عم حضره، بتجي جارتني لعندي بتقلي "شو عم تعملي؟ عم تعملي كبي نية؟" قللتها لأ، كبة عدس، تطلعت هيك في، أستغربت، قالتلي "شو؟"، قللتها كبة عدس، قالتلي "شو هو هيدا العدس؟ ليش لونه هيك؟" قللتها "مش هيدا هو اللي بيعملوا فيه"، قالت "ولك لأ يا-- بيعملوا بهيدا اللي لونه بردقاني، هيدا المجروش"، شو قللتها أنا؟ قللتها "إيه، سمالله عليكي، ما هيداك لونه أورانج، وكبة العدس بكون لونها أصفر، كيف يعني بدك بهيدا الأورونج؟"، قالت "ولك يا عمي بس يسلقوه، بصير لونه أصفر"، أنا قللتها "خلص، عملتها، ما بعرف"، طالعين هني، بتعرفي، شباب وجوعانين من الشغل، زبطت أنا هالخرصة، ورتبت هالطاولة، وعملت هالكبة، وحاطة عليها زيت، إجوا شو؟ ضووا عيونهن، "واو، عاملينتنا كبة نية اليوم؟"، قللتهن لأ، كبة عدس [تضحك]، كانوا عم يضحكوا، جمدوا [تضحك]. أكلوها هيك، قال طيبة، طلعت طيبة، بس إنو لونها غريب، هيدي من النهفات اللي عملتها أنا. مرة مثلا إجي عبالى أعملهن مفتقة، وهي حلو بيروتي، هيدا المفتقة، بيعملوه من الرز، ما يعرف إذا كل الناس بتعرفه، فأنا ممم، أنا لما جيت بدي سافر، ووحضر جهازني، أول شغلة إشتريتها، قبل ما إشتري ثياب، أو مايك أب، أو أي شي، اشتريت كتاب "ألف باء الطبخ"، عشان ما بعرف أعمل أكل [تضحك]، فأنا مرة كان عندي قرابتي، عملتها للمفتقة، وساعدتها فيها، بس أنا ما بعرف مقاديرها ولا شي، فقللتها "يلا، شباب، همتكن اليوم، بدي طعميكن أكلة حلو كثير طيبة، أكلة بيروتي، بس بدكن تساعدوني، لأنو هيبى بدها كثير دك، تدعكوا فيها كثير، ممم، فقللتها "بدكن تساعدوني فيها، أنا ما فيني أعملها لوحدي"، قال إيه، تكلمي، حطيتهن هالطنجرة، وحطيت فيها هالرز، وإدعكوا لتدعكوا، بتعرفي شوب هونيك، بأفريقي، ويزخهن العرق، يا حرام، ويزخهن العرق، و[يسألوني] "خلصت؟"، قللن لأ، بعد، بعد، ما لازم يبين الرز، لازم ينظن منيح إنتوا وعم تدعكوا، خلصت المفتقة، قالولي "هيدي لمفتقة فتقتينا فيها، الله يرضى عليكي، معش بدنا ناكلها نحن" [تضحك]، فكمنا هيدي من النهفات اللي عملتها فيهن، عاملة قصص كثيرة فيهن، بس إنو حلوة، حلوة التجربة، حلو الواحد إنه، مم، أنا من الناس اللي ما بحب قول ما بعرف، كلمة ما بعرف كأنو أنا بشيل المسؤولية عن حالي وخلص، لأ، المفروض الواحد يجزّب ويجزّب، لحتى يوصل، وهيدا اللي كان أنا الهدف اللي بحياتي، لأ، جربت، ما زبطت معي هالمرّة، بتزبط ثاني مرّة، مرة قررت بدي أعجن وأعملهن يمكن فطائر، أنا ولا مرّة عاجنة، جيت هالكتاب، وحطيت، حطيت هالطحين، حطيت هالمي، بلشت أعجن، هالعجين يلزق بأيدي، يلزق بأيدي [وأسأل نفسي] "يا عمي ليه عم بلزقوا هيدول؟"، إرجع أعجن، وقول يمكن بعد لازم أعجن أكثر، هيك ما بعودوا يلزقوا"، ضللت أعجن تقريبا شي ثلث ساعة ويصلهن يلزقوا، هلكوا أيدي، وبعده عم يلزق العجين، يا عمي شو بدي أعمل؟، كمشت، قلت أحسن شي، كمشتهن العجينات هيك، وكبيتهن بالزبالة، وجبت طحين ومي، وقلت أنا بدي حط مثل ما بدي الميات [تضحك]، حطيت المي وعجنتهن، ومشى الحال، ف، يعني، مثل ما بقولوا، الإنسان ابن التجربة، بعدين تعلمنا الحمدالله، ومن القصص اللي صارت معي، مثلا، ممم، مثلا وقت الولادة عندي، كان الحكيم مدرّبي كيف أنا لازم، بس يصير عندي الطلق، كيف لازم راقب الطلق، وراقب الساعة اللي إلي،

[00:40:41] وأعرف أي وقت أنا صرت مهينة روح عالمستشفى لوأد، إنو مش بس إنوجع دغري بدي إنطلق وهيك، فيذكر بوقتها، بلش الطلق عندي الساعة 5، وظهرت لبرا عالصالون، ما فينتت زوجي، ما خبّرتة إنو أنا موجوعة، بقيت، بقيت لل8:30، أنا وطلق، وإمشي، وإتنفس، وهيك، وأكثر من هيك، بس يروح الطلق، قول لأ، أنا بنتي بدها تجي عالنديا، لازم تشوفني حلوة [تضحك]، ف، عملت شعراتي جدولة، هيدي اللي بتبلس من هون ونزول، وبس يجي الطلق، أوقف هيك عجنب، لتروح، إرجع، حطيت مايك أب [makeup] كمان، [تضحك]، زبّطت حالي عالآخر، ليه؟، لأنو أنا بنتي بدها تجي عالنديا، لازم تشوف إمها حلوة. [تضحك]، المهم، ضللتني إتوجع، فاق زوجي على الوقت اللي بدو يروح في هعالشغل، فشافني، رغم إنو عاملة كل هيدا، بس حسني مني، يعني، مش أنا اللي كل يوم بكون، في شي هيك، إنز عاج، وتعب، في تعب بوّجي، فسألني، قلّي "ليش فايقة؟"، قللتها "لأ، ولا شي، هيك"، قال "لأ، في شي، إنت مبين عليكي كأنو موجوعة، أو تعبانة"، قللتها "عندي

طلق، يمكن بدي وأد"، أنا قلت هيك، هو دبّ الرّعب فيه، ما عاد عرف شو بدو يعمل، تلبك، [تضحك] [قال زوجي] "عجلي، تلفني للحكيم، تلفني!"، قلنا "يا عمي، روق، روق، ما هو قايلي كيف بدي أعمل"، [قال] "لأ، هلق تلفنيه"، قلنا "أوكيه"، تلفنا للحكيم، قلنا لازم تتوجهي عالمستشفى، المهم، أنا ونازلة، ما حدا صدق من الجيران إنو أنا رايحة وأد، كلهن مفكريني رايحة أعمل صبحية [تضحك]، لأنو حاطة full make-up، ما مبين عليي إنو بدي وأد [تضحك]، رحت لوأد، في لحظة كانت هيك، ممم، اللحظة اللي بكون الإم عم تطلق، وعندها هيدي الأوجاع القوية، بنكون كثير بحاجة لأمها تكون حدها، إختها حدها، تمسكها إيدها، تمسك شعراتها، يعني قد ما يكون الإنسان قوي، بهيدي اللحظات بكون كثير كثر شفاف وضعيف، بدو هيدي الحنية، وأنا ما كان عندي حدا، وأنا أصلا ما عندي إخت يعني، وماما متوفية، فما عندي حدا هونيك، فأنا عم بطلق بالمستشفى، وال nurse حدي، بس أنا ما عم بحكي ولا كلمة، ولا كلمة، عم بتوجع بس بلا صوت، الموقف اللي نزلني دمعتي، صارت تمسلي عشغراتي، حسيت كأنو، هيك، عزت عليي الدنيا، إنو هيدي الإنسانية أنا ما بعرفها ولا بتعرفني، ولا من بلدي، ولا بتقربني، وحنت عليي، فهيدا الموقف بكاني بلحظتها، ولدتها لبنتي، والحمدالله، كل الأمور مشيت تمام، وكانت لعبتنا بالبيت، نتسلى فيها، هني شباب، وأنا، نتسلى فيها، لعبة كانت لإلنا، وبعدين قررنا نجيب الولد الثاني، ما نطول، لأسباب صحية بتعلق كانت بزوجي، فبتذكر شغلة كثير كمان ما بنسأها، إنو أنا، باللمحة اللي أنا بدي روح فيها لوأد، بنتي وعيت بكير على غير عادة، وصارت تتعربط بإجري، تعطيني وتتربط بإجري، فأنا كنت عم بيكي كثير كثير، إنو أنا، هيدي الطفلة الصغيرة صغيرة، أنا رح إتركها حتى روح ولد، يمكن إرجع، يمكن ما إرجع، ممم، قلبي إحترق عليها، وبنفس الوقت كنت كثير خيفانة إنو بعدها كثير صغيرة، كأنو أنا عم بظلمها لما بدي جيب ولد ثاني، والمفارقة إنو هيدا الشعور كله بعد ما ولدت وبعد كم ساعة جيت عالبيت حاملة البيبي الثانية، حسيتها لبنتي --كنت عم بيكي إنها كثير صغيرة، حسيتها صبية قدامي، قدام إختها، فهيدا التناقض بالشعور خلال كم ساعة سبحان الله كيف تغير كل الشعور، حسيتها إنو لأ، هي صارت واعية، صبية، وهيدي الصغيرة هلق صارت. الكبيرة كانت شخصيتها قوية،

[00:45:41] الصغيرة كانت بتخاف كثير، وعقولة. كنت إنزل ساعد زوجي بالشغل كمان، كان بيشتغل بالتجارة، كنت ساعده بالمحل أوقات، بأوقات كنت إضطر حتى إنزل مع بنتي الصغيرة، نزلها معي، لأنو ما في حدا يقعد بالمحل، إضطر إنزل إشتغل كمان معه، ساعدته، تساعدنا مع بعض، قررت بوقتها إنو خلص، هيدول الولدين، المفروض إنو هلق ما جيب ولاد، خلي هيدول الولاد ياخدوا حقهن من الحياة، ياخدوا حقهن من التربية، وهيدا اللي صار، وتقلنا من مكان لمكان، وتعرفنا على أشخاص كثير وصار عنا صداقات كثيرة، بس بالنسبة لألي أنا، من الناس اللي ما كثير بحب يكون عندي علاقات كثيرة، بتعملي إرباك، بحس إنو صديقة وحدة تكون تشبهني بطبيعتي، بقاعاتي، بستغني، بتغنييني عن الناس كلهن صراحة يعني، لهيك أنا ب12 سنة اللي قعدت فيهن بأفريقيا كان عندي بس صديقتين، صديقتين حقيقية، يعني هني هيدول بعتبرهن صديقات تركوا بصمة بحياتي لهلق هني قلبي، رغم إنو أحيانا الحياة بتفرقنا، بتعدنا، ما ملتقي، بس هني موجودين محفورين بوجداني بقلبي بضميري بذاكرتي، لكن هيدول الثنين ما كانوا بنفس الوقت، يعني أنا بمرحلة كنت مع هيدي الصداقة، وبعدين صرت بعيدة عنها، فبالمكان اللي أنا رجعت قعدت فيه، صار عندي صديقة ثانية، لكن تبنيناهن أنا هلق بتواصل معهن وبحبهن كثير، والصديقة الأولى هي ساعدتني كثير بأول بيبي اللي جبتها، كانت تساعدني بتحميمها، حتى بخلال الوحام، كانت تفتولي الأكل - كنت أقرف من الأكل اللي أنا حضره لألي، ما إقدر أكل منو، وإخجل قلها جيبي شي من عندك عامليته، فأنظر، قول يا رب تبعتلي شي عشان أكل اليوم، هيدي الإنسانية ما بنسأها لأنو كثير ساعدتني، وفتت جنبني ببنتي، ساعدتني معها كثير، ممم، تقريبا هيدي يعني المراحل اللي عم بقطع فيها كنت، أكل بنت وتاني بنت وبعدين إنتقلنا سمنا بمكان تاني، ممم، هونيك كمان صار عندي بعد 5 سنين قررنا نجيب ولد، جبت بنوئي الثالثة كمان، أنا من الناس اللي كثير بحب الولاد الصغار البيبيات كثير كثير بعشقهن، لدجة إنو أنا ولادي رغم إنو صار عندي 5 ولاد لكن ولا ولد ما كنت أنا أقعد حد تخته وإطلع فيه وإتمله هو وغفلان، وإشقله بس بنام، هالقد أنا كنت بحب الأولاد الصغار كثير، كثير بحبهن. مم، بنتي الثالثة كانت كثير عقولة، ممم، أنا وحامل فيها كنت إشتقلها هي وببطني، وإتمني إذا إقدر إفتح بطني وضهرها لعبها شوي إرجع فوتها، أنا صرت إم [تضحك] حصير إم لثالث ولد وبعدي [تضحك] بعد في جواتي هيدي الطفلة، إيه ضلني إحكي معها كل ما إقعد، إتحذت أنا وياها لما نكون لوحدا، لمن كون بغرفتي، حدثها وإشتقلها كثير، وخلقت وكانت كثير عقولة، من الإشي اللي بتذكرها فيها هي ولا مرة أنا وعيت وهي عم تبكي بعدها تاكل مثلا، بعمر ال3 أشهر، 4 أشهر، 5 أشهر هول، ولا مرة هي زعجتني وقامت عم تبكي، عم تصرخ بعدها تاكل، كنت حط تحتها بلزق تحتني، وإلو قضبان هيك خشب، كنت أوعى، فتح عيونني، لاقيتها قاعدة بالتخت وعم تطلع فيي، [00:50:41] بس صافنة فيي عم تطلع بوجي، بس فتح عيونها تضحكلي، فأنا قلبي هيك يفرك عليها، يوجعني قلبي إنو بنتي جوعاني بس هي ما عم تحكي ناظرة لفيق، فكنت قوم بسرعة بسرعة أعملها البيبيرون أخذها لحتى تاكل، هيدا الشي مثلا إختلف مع خبها اللي أصغر هلق منها بسنتين، هيداك إذا كان يفيق وأنا نائمة، يقول ماما مرة وحدة، ماما، ما رديت، تاني مرة ماما، ما رديت، ممم، يصرخ كلمة ماما بصوت عالي [تضحك]، صير على إيدي وإجري، ركض إحني عالخت لأقطع، لأنو لما كان عندي إجابني الصبي، كان عمره تقريبا شي 7 أشهر، 7 أو 8 أشهر تقريبا، وقرر زوجي إنو ينقل عبلد ثاني يفتح هو

مشروع شغل هونيك وكنت أنا بقيت بالبلد هيدي مستلمة التجارة اللي إلو، وكان أنا صار عندي 4 ولاد، بنتي الثالثة كان عمرها تقريبا شي سنتين و9 أشهر، إيه، وإبني كان عمره شي 8 أشهر تقريبا، فأنا بوقتها إستلمت التجارة اللي إلو، وهو عنده 4 ولاد صار، وهو هيدا الصغير كان كثير عصبي، ما إسترجي إلبد، يعني إذا عيط ماما وما قمت معناها الصريخ لوين، وكنت نيمهن معي بالغرفة خاف يناموا لوحدهن، مع إنو عندي كان خادمة، وكان عندي عشي يروح عبيته، بس نيمهن معي كلهن بالغرفة، بهيدا الوقت، لأنو زوجي منو موجود، فأنا لما يصرخ إبني ماما، وتاني مرة ماما، وبعدين يصرخ، صير بإيدي وإجربي أركض عالنتخت مشان ما يفيق إخواته، بذكر كثير تعذبت، مرة مضهر إجره يمكن كان من التخت، وقالب، ف إنشعر فخذ، إضطروا يحطوله جفصين يجبروله إجره، والحوض، لحد الحوض، يعني ل فوق، ف ياما ليالي أنا نيمه عالفرشة عالارض وأنا نام عالارض حده، هويله كل الليل لأنو يكون دايق خلقه مروجع، ما نام بالليل و عندي محل بدي إنزل عليه الصبح وكان في معاناة بهيدي الفترة تعذبت ولسوء الحظ بوقتها صار في إنقلاب، أول إنقلاب صار بالبلد عنا، وصار في قواص وحرب وصاروا يهجموا عالمحلات، الأفارقة، ويسرقوا، يفصوا كل المحلات، كل السوبرمارشيه، الكبار، بطريقة كثير غريبة، وسريعين كانوا، وما يخلوا ولا شي بالمحل، ولا شي أبدا أبدا، كأنو جراد وفات عالعمل ياخذوا كل شي، وكانوا الجالية هونيك لأنو ما في سرية مصرفية أغلبهن يحطوا مصرياتهن يا بالبيت أو بالمحل يخبوهن فكثير ناس حرام إنسرقوا بهيدي الفترة خسروا كل شي عندهن وحتى لدرجة إنو ما قدروا يقطعوا تيكيت [ticket] لعلهن لحتى يرجعوهن علبان، كان في خوف كثير وكان في يعني لدرجة إنو كانوا يقوصوا تحت البيت عندي وأنا معي 4 ولاد فعشت هيدي المعاناة صراحة، عندي كان مصاري بالمحل، مصاري شرك، ومصرياتنا نحن، رأسمالنا يعني، كنت كثير خيفانة من هيدا الموضوع إنو يهجموا عالعمل وياخذوا كل شي فقررت بيوم من الأيام إنو أنزل أنا عالعمل، غامر يعني، وطلع المصاري كلهن عالبيت، ولاقي طريقة إبعتهن لزوجي، فاللي عملته، المنطقة اللي نحن فيها كان في مجموعة من الحشاشين والزعران وهني كثير قواية كانوا بوقتها، حكبوا معهن الشباب اللي عندهن محلات بالمنطقة عنا، إنو احرسولنا المنطقة، إحموها، لحين ينتهي الإنقلاب ونحن مستعدين إنو نعطيكين يلي بدكن ياه،

[00:55:41] فأنا قلت، وأنا عادة لما بنزل عالعمل وطلع هني بكونوا قاعدين، فيقلهن بونجور أو بونسوار أو اللي هني يعني، بسلم عليهن، بتحسي الأفريقي بس تعطيه هيدا الإهتمام، الإحترام يعني، كثير بقدر هيدا الشئ، فخبرتهن بوقتها قتلهن إنو أنا ما عاد عندي أكل بالبيت، أنا مضطرة إفتح المحل بدي جيب أكل لأولادي، إذا بتقدروا تساعدوني توفولي عباب المحل لطلع الأغراض، قال "طبعاً مدام، تكرم عينك"، نزلت بوقتها أنا وحدا بيقرّب سلفي، وقتنا عالعمل وسكرنا، وأنا حزمت حالي بالمصاري، وهو أخذ شوي مبلغ كمان، حطه معو، وقتنا الجرار، وقتلتهن ضهرولي الكراتين، حطيت، كنت محضرة كراتين، السباغيتي، سوس تومات، وهالأشيا هيدي، والحليب وهيك، وقتلتهن "طلعولي ياهن"، فطلعولي ياهن، ما فوتوهن عالبيت، عالدرج، وقتلتهن "إفتحوا كل الكراتين وخذوا قد ما بدكن منهن واخلولي بس حصة لألي ولأولادي ليكفوني يعني"، فهني كثير لقوها شغلة كثير مبسطوا منها، ويشكروني ويشكروني وقتلتهن إذا بدكن شاي قهوة اللي بدكن ياه أنا جاهزة تكرم عينكن، بهيدي الطريقة أنا لما فتحت الكراتين تعمدت إفتحهن على الدرج ما فوتهن مشان ما يشكوا إنو أنا معي شي، حاملة شي، أنا الطريقة اللي حزمت فيها مصرياتي ما كان في شي ظاهر للعيان ليقلهن إنو أنا حاملة شي وقتحت الكراتين عن عمد لحتى يشوفوا إنو الكراتين فاضية ما فيها مصاري أو شي، بهيدي الحالة أنا طلعت كل المصريات اللي عنا، حكيت مع زوجي وقتلته بيعتلي حدا ياخذ المصاري، فوقتها بعثلي حدا أخذ المصاري وسلموه المصاري برا، خطوة كانت جريئة وفيها أكيدة مخاطر، بس بتستاهل إنو الواحد يخاطر لأنو بلحظة كان إذا هجموا بيفقد كل شي الواحد فقلت أنا ما بيمنع إنو أنا خاطر غامر وإنشالله الله بوقتني وهيدا اللي صار. ممم، كانت صعبة القصة إنو عم يتقاتلوا تحت وعم يقوصوا تحت بيتك وعندك ولاد صغار ومسؤوليات وعندك محل وهيك، وضرايب ومشاكل بالبلد وهيك فكان في صعوبة عليي كانت تجربة صعبة فعلا، بعد هيك بيوم من الأيام بتفاجئ أنا وبالبيت طلعت من المحل، ببجوا شخصين هيك طوال ولايسين رينجر وبناطلين جيش وبيطلعوا لعندي عأساس إنو هني زباين عندي، بيحكوا مع الناطور وبقولوله "نحن زباين عند مدام وبدنا من عندها بضاعة". فطلعهن الناطور، هو ناطور كبير بالعمر، عأساس إنو هني زبايني، بس هني كانوا بوقتها حرامية، بابي أنا كان حديد مثل السجن يعني بقدر شوف من وراه وبوقتها كان يوم عصر وقاعدة عم طعمي ولادي الصغار اللي هني الصبي والبننت، عم طعميهن، بتفاجئ إنو الناطور واقف عالباب، العشي كان عندي بالمطبخ والشغيلة مع البنات، بقلي "مامم هيدول جايبين لعندك"، أنا مقفل باب الحديد، أنا عم بتطلع فيهن إنو هيدول أنا ما بعرفهن، مين هني، إلا فتحلهن العشي، فاتوا لعندي، واحد وقف حدي هيك عنده muscles وطويل، ضخم يعني، وعضلات وهيك، بقلي "إنت مدام --؟"، قتلته إيه، مجرد ما قتلته "إيه أنا مدام --"، دغري رفع سلاحه قلي فوتي معي لجوا عالغرفة، الثاني خلا الناطور والعشي والشغيلة بطحهن بالأرض ناموا بالأرض وحط ولادي بالزاوية، فهيدي كانت جداً قاسية عليي، ما بنسأها بحياتي، وكان إلهها كثير تبعات بعد هيك يعني أرتني نفسيا كثير،

[01:00:41] فوتني هيدا الشخص على غرفتي وهيي أكيدة حدا فسدة فاسد عليي لأنو واحد غريب ما حيعرف بخريطة البيت وين غرفة النوم اللي إلي أو غرفة النوم تبع الخادمة وتبع الأولاد وما بعرف شو، فوتني إلي عغرفتي وسكر الباب وقلي

"أعطيني المصاري كلهن"، فهون بهيدي الحالة لما إنت ولادك برا مع هيدا الأفريقي المسلح، والشغيلة كلهن بالأرض منيمينهن، ما كنت عارفة ولا فيني أضمن ردة فعله لأنو هيدا الإنسان ممكن يكون ماخذ drug محشش أو حتى شربان فما فيني أعرف يعني بأي لحظة ممكن يقوصلي ولد من الولاد ويخسر حياته ولدي فكان عندي يعني، كان ربع ربع بالنسبة لألي، عقلي كله برا مع ولادي اللي أنا ما عم بقدر شوفهن لأنو أنا الباب مسكره علي، تجربة كانت جدا قاسية، قتلته "ما في مصاري"، قلي "مبلا في مصاري طلعيهن أحسنلك"، فأنا هون إضطريت، لأنو أنا صرت عالمكحك إذا ما أعطيت المصاري ممكن طلع ويقوصلي شي ولد، فأنا طلعت المصاري، كانوا المصاري مقسمين بمطراح، شوي هون شوي هون فأعطيته، أخذ بتذكر وقتها بيت المخدة فضاه، وحط المصاري فيه، وقلي "بعد في مصاري اعطيني ياهن"، قتلته ما في مصاري، قلي "عم قلك في مصاري بعد، أعطيني ياهن أحسنلك"، رجعت طلعت الجزء الثاني وأعطيته ياه، قبل هيك كان عم يقلي "أعطيني الذهب اللي عندك"، أنا قتلته ما عندي ذهب، قلي "مبلا عندك ذهب، أعطيني ياهن أحسنلك"، ممم، طلتهن للذهبات، مع إنو لو قتش الغرفة كلها ما ح يستهدي الطريقة اللي كنت عامليتها أنا ما فيه يستهدي عالذهبات بس لأنو ولادي بالمحك أنا مضطرة أعطيه كل شي بدو ياه بس ما يأذيلي ولادي، فطلعت الذهبات وأعطيته ياهن ذهباتي أنا وذهبات ولادي وكل النقط اللي كانت تجيهن لأولادي كل الكادويات كلها أعطيته ياهن وللأسف كان في قطعيتين ذهب قيمتهن المعنوية جدا كبيرة غير إنو هني أصلا وزنهن كبير، بس إنو هني للماما الله يرحمها، وقت ما استشهدت وقت ما قتلوها كانت هي مخبيتهن بصدراها، وبعد ما استشهدت أهلاتي طالوهن من صدراها وخبولي ياهن، يعني خبولي ياهن تقريبا شي 12 سنة لحتى كبرت وخطبت لحتى سلموني ياهن ورغم كل شي مرق من حروب وهيك مرت عمي كانت بس تهرب تخبيهن بصدراها مشان تحافظ عليهن لأنو هيدولي أمانة لألي أنا، بس كبرت وجيت بدي إتجوز سلمتني ياهن قائلتي هيدي الأمانة تبعيت ماما، هيدول لألك، فكثير كثير احترق عهيدول القطعتين اللي هني تذكر من ماما، ما همني ولا شي لا الذهب ولا المصاري اللي أخذوه كله كله ما همني إلا هول القطعتين اللي هني تذكر منها كثير كثير بكيت عشانهن، المهم أخذ الذهبات، رجع صار يصير إنو بعد في ذهب بدم تعطيني، فقتله لو سمحت تطلع بالكيس وشوف قديش هني، أنا ما عاد عندي ذهب، لما تطلع ولقي إنو كمية كبيرة إقتنع إنو أنا ما عاد عندي ذهب، بوقتها صار قلي "أعطيني المصاري"، أول مرة أعطيته، ثاني مرة أعطيته، بهيدي اللحظة اللي أعطيته ثاني مرة أنا كل الوقت عم قله الله يخليك إذا بتريد ما تعملولي شي لأولادي، اللي بدكن ياه بعطيك ياه بس إذا بتريد ما تعملوا شي لأولادي، وعم ببكي ورح إنهار بعد شوي وعقلي برا، يعني ما عم بعرف و عم بصير مع ولادي، فجأة بشوفه بيتركني ويفتح بسرعة بده يضهر، دغري أنا كمشته هيك شديته قتلته الله يخليك ما تقتلي ولادي، أنا فكرت إنو هو بده يضهر بيقتل ولادي، تاري هو دينته مع برا بهيدا الوقت كان في عندي أنا خي زوجي، بيجي بطل علينا العصر أو المغرب وأحيانا منتعشى نحن وياه، بطل عالولاد وبيحمل حاله وبروح، طالع هو عالدرج لاقى إنو ما في صوت بالمطبخ عادة بس يطلع بكون العشي عم يحضر الأكل والأولاد في ضجة يعني في 4 ولاد،

[01:05:41] فلاقى إنو في هدوء تام ما في شي، إستغرب، عم يفتح الباب هيك شافهن بالأرض، هو عم يشد الباب ليرجع لورا، يعني هيدي غريزة البقاء مثل ما بقولوا، دغري كان الحرامي الثاني لاقطه ومفوته لجوا، خيو لجوزي كان معه هيدي الطساسة اللي برشوا فيها الحرامية ما كان عنده مجال، هيداك أخذها منه وزنله ياهها، هو وقفه عالحيط، خيو لجوزي شو كان عم بقله "خدوا اللي بدكن ياه بس ما تعملوا شي للأولاد"، بهيدا الوقت هيدا اللي جوا معي كان عم بسمع إنو ففي ضجة برا لهيك هو فتح الباب ليشوف شو في برا لما أنا عم قله ما تعمل شي لأولادي وانشق الباب فتح شفت خيو لجوزي موقفيه على الحيط ورافع إيديه، هيدي اللحظة صرت أنا رغم إنو هو ما قادر يعمل شي لكن أنا صرت قدراني فكر ولو لثواني شغلت عقلي، فكان عندي أنا شنطة فيها تقريبا شي \$24,000، حاطيتها تحت، هيدي مصاري الشركة، للشرك اللي مناخذ منهن البضاعة، هيدولي كلهن محطوطين مع بعض بشنطة من تحت وكان عندي جزدان حاطة فيه، مليون تقريبا شي CFA 25 يعني تقريبا منقول شي \$100 أو \$50، والله مش متذكرة بالظبط، بس هني عبارة عن coins، coins مثل كيف لما منقول ربع ليرة، ونص ليرة، وعشر قروش، هيدا التفصيل، مليون هيدا الجزدان هيك، فأنا قلت بدي إلعب على هيدي trick لشوف إذا بقدر نجى مصريات الشرك، مصاري الناس اللي معاطيبيني فيها بضاعة، فأنا هو لما ظل لبرا وأمن إنو رفيقه مسيطر عالوضع رجع فات لعندي، قلي "أعطيني باقي المصاري"، هون شو قتلته أنا؟، أعطيته الجزدان، وقتله "لو سمحت ما عاد معي إلا هيدول الcoins"، هيدول أنا بخليهن لمصروفي اليومي بشتري فيهن الخبز واللحمة لأولادي، هيدول أنا بعد اللي باقيين معي، بذك ياهن خذهن، ما بدي ياهن، خذهن، خالص، هو تطلع هيك لما شاف بالمنطق، لما بدو يشوف إنو أنا صرت عم بعطيه coins معناها ما عاد عندها شي المرأة، فأخذ هيدا الجزدان وحطه، تيليفون كنت جايبيته جديد بعده نازل جديد نوكيا [Nokia] بتذكر، يعني كان يمكن صرلي جمعيتين مشتريته كمان أخذه وكمان حطه بهيدا الكيس تبع المخدة، فوتونا، فوتوا الكل، الشغيلة وحي زوجي والناطور وقلوا علينا الباب وحملوا حالهن ونزلوا، هني وطالعين عالدرج بكون في الخدم للجيران اللي عنا تحت بالطابق اللي تحت في منهن بكونوا خالصين شغلهم بيقدوا عالدرج بيقدوا ببسولفوا وبيحكوا، فهني وطالعين قبل ما يطلعوا لعندي طلعوا وسلموا يعني bonsoir وهيك وطالعين وبكل برادة يعني مش إنو خيفانين أو شي وحتى جارتني بابها قبال الدرج كانت عم

تقطع ببتذكر بوقتها يمكن تبولة، وبتتها عم تدرس مع الأستاذ بالصالون، يعني الصالون هي قاعدة فيه بس بابة دغري قبال الدرج وبتتها عم تدرس مع الأستاذ، لما طلوعوا قالولها bonsoir madame قالتلها bonsoir بس هي --تسي -- تطلعت قالت "مين هني هيدولي؟ أول مرة بشوفهن"، بس ما علقت عالموضوع، لما فاتوا وما عادت سمعت طحشة ولا صوت، فبتقله للإستاذ "دخلك ما عاد طلع صوت جوا، معقولة يكونوا حرامية هول؟ هات لقوم شوف"، قلها "لوين بدك تقومي تشوفي؟ سكري بابك وإقعدني عجنب، إذا حرامية ببقتلوكي"، فما قدرت حرام تعمل شي هي، سكرت بابها، لأنو صارت في حياتها عالمحك، ف رجعوا نزلوا بكل هدوء ورواق، هلق لما سكروا علينا، أنا شو بدي أعمل؟ لمين بدي؟ إجباري بدي دق لجاتي إنو "تعي إفتحيلي الباب، مقفلين علينا باب غرفة النوم"، هيدا العشي اللي عندي شو عمل؟، راح فتح الشباك، شباكنا بطل لتحت عالباحة، فتح الشباك حتى يصرخ إنو حرامية، بهيدي اللحظة اللي حسوا فيها إنو في حركة، فتحوا رجعوا الباب علينا، لقيوه على الشباك بدو يصرخ، لقطوه، حطوه بالأرض وبدهن يقوصوه، وأنا شفت هيدا المنظر وطاروا عقلائي، صرت بعد شوي بدي إنزل عاجريهن [وقول] "دخيلكن ما تعملوله شي وأنا بوعدكن ما حدا حيكي شي"، فالمهم تركونا ورجعوا قفلوا علينا، [01:10:41] وراحوا نزلوا عقلية من مهلهن وراحوا نزلوا الجماعة، دقيت لجاتي أنا وقتلها إنو لو سمحتي تعي افتحيلنا راحوا الحرامية، فإجت فتحتلي، هيدي الصدمة هزنتي هز وخاصة إنو ولادي كانوا عالمحك بهيدا الموضوع وكثير كثير كانت صدمة لألي إنو أخذوا الذكرى الوحيدة من إمي كمان كان كثير صعبة هيدي القصة عليي وفوق هيدا وكلو يعني كنت قاعدة عم ببكي بس قلت بدي دقلهن وأشكرهن لأنو ما جربوا حدا منهن لا سمح الله يهينني أو يمد إيده عليي وأنا كنت بوقتها محجبة، ولا حتى جرب إنو يسطع مثلا المحبس يسحبه من إيدي أو يكشف مثلا قميص النوم اللي لايسيته لياخذ السنسال اللي برقتي أو حتى يرفع الكم ليشوف البلاك اللي بإيدي، لأ، هيدي الإشي الحمدالله ما قرب صوبي، أنا قلت بدي إشكرهن [تضحك] إنو يسلم دياتكن ما علمتولنا شي، بس للأسف كان صار شايلى الكارت من التيليفون تبعولي وكاتبه، عشت تجربة صعبة وصرت إذا إنزل عالمحل، بحياتي أنا مني منتبهة لواحد أفريقي عامل سكسوكة، صرت كل واحد عامل سكسوكة يفوت عندي عالمحل حس ضغطي قشط وحس كأنو مي سخنة عم تتكب عليي وصير أرجف دغري، فكر إنو هيدا هو الحرامي عم يرجع يجي لعندي مرة ثانية، كان بالنسبة إلي كابوس هيدا الموضوع، وكل واحد شوفه عنده سكسوكة بإعتقادي إنو هيدا هو الحرامي وجاي يرجع يسرقني مرة ثانية، ما قدرت إتحمل إنو كمل بالبلد وضلني بعد وأخذ risk أكثر من هيك وخاصة إنو زوجي ما قدران يرجع لأنو خلص صار فاتح شغل هونيك أسس لشغل فانا بوقتها قلته إنو أنا ما عاد قدراني كفي بهيدي البلد، فلي خلص صفي الشغل عندي وبيعي البيت والتحقني فينا إنت والأولاد، وهيدا اللي صار، خلصت كل شغلي وخلصت مع الشرك ورجعتلهم كل مصرياتهن وكلو كان مبسوط مني وكلو كان عم يقلي خليكي إبقي، كانوا مبسوطين بالتعامل معاية، قتلهم بعقلي "ولا رح إبقى ولا لحظة"، وحملت حالي ورحت لعند زوجي على دولة ثانية كمان بأفريقيا، هونيك [تضحك] هونيك في صدمة كبيرة كانت، هونيك بهيدي الدولة الأفريقية يمكن لبنانية في شي 3 أشخاص، رجال كمان مش نسوان، ما في حدا، ما في حياة للمرأة يعني إنو تحس حالها إنو والله رايحة تضره وفي عندها أصدقاء وتتعرف عحدا يكون عندها حياة إجتماعية لأ، والمدارس اللي حطينا فيهن الأولاد مدرسة فرنسية، كان دوامهن مثل دوام إيماننا نحن وصغار لما كنا بالمدرسة، كنا نروح من الصبح للظهر، نجي نتغذا ونرجع من الظهر لعشبة، فكان سيستم الفرنسي هونيك إنو نفس الشئ الدوام كل النهار، يجوا يتغذوا، يرجعوا يروحوا وزوجي كمان يجي يتغذى ويحمل حاله ويروح، من المفارقات اللي صارت، هلق نحن صح ساكنين بVilla وفي جينية وهيك بس البلد ما فيها مي كثير ف بوقتا أنا كنت باعثة بناتي الإثنين الكبار علينا يشوفوا أهلاتهن وبيت جدهن وكانوا الصغار معي قاعدين، فكنا ننظر كل يومين وثلاثة لحتى تجي المي، كان عنا غالونات نعبين مي، وبس بدنا نتحمم صح في دوش بس ما بتنزل منه المي، ما في ضغط مي لينزل بالرشاش فكنا نضطر نسخن المي ونتحمم بالجاط [تسعل] والكيلا [تضحك] وهيدا الشئ كان مأساة حياتي كثير لقيتها صعبة كثير خاصة إنو نحن بحياتنا من لما كنا صغار للما كبرنا ما كنا نتحمم بجاط وكيلا، يعني كل حياتنا عنا حمامنا والدوش تبعولنا فيتجي عهيدي الحياة لتتطري لتجي المي مثل الخيط الساعة 2 بالليل أو 3 لتعبي خمس غالونات ليكفوكي كم يوم كان دمار لألي بس ولا يوم أنا جربت إتأفأف أو قول لزوجي "بي شو هالحياة و" أنا ما بقدر عيش هيك"، مع إنو كان بيتي أنا بلبان بيت مجهز وفيه عفش وكل شي، [01:15:41] يعني أنا كنت بقدر قله أنا بدي عيش بلبان وإنت دبر حالك هون، يمكن لأنو نحن فقندا أهلنا نحن وصغار بالنسبة لأننا العيلة شي كثير مهم فانا ضحيت بهيدي الفترة بكل شي بيتعلق فيي بالحياة كرمال إنو نضلنا مجتمعين كعيلة مع بعض الأم والبي والأولاد، هيدي القصة ما كثير طولت لأنو زوجي كان ذكي، لقي طرق لحتى يأمن المي بطريقة كثير منيعة وعمل هو صمم خزانات رسمهن وخلي أفاقه يعملوهن، عمل خزانات كبيرة وحطهن على قاعدات وعلاهن ولأول مرة جرب مبسوط إنو صار عنا خزانات كبيرة وكلها مليانة مي حنتمم بالدوش، فتنا فتحنا المي ما كانت تنزل المي بالدوش، هو صار يفكر يا عمي ليه؟ صار عنا مي كثير، بعدين قال الظاهر إنو ما في ضغط، قوة دفع للمي لتفوت بالرشاش، رجع كمان جاب موتير ثاني وحطه ليقوي الضخ وهون [تضحك] صارت قصص المي تمام التمام، بذكر إنو في حدا من أصدقائنا كان ساكن هونيك كان صرله تقريبا يمكن شي 10 سنين، 10 سنين عنده بالحمام حاطط برميل بعبي فيه مي وبيتحمم منه لهيدا البرميل

بالكيلة يعني، فلما عرف الحج إنو عمل هيك تفاجئ إنو والله برافو شاطر، إجي كمان هو عمل نفس الشئ، وين الضحكة؟، هيدا الشخص مبسوط كثير بدو يتحمم أول مرة بالرشاش، حط ثيابه وحط المنشفة تبعيته، حمل الكيلة وتحمم، أيمتين تذكر؟ بعد ما خلص الحمام [تضحك]، إنو بي ما أنا بتحمم بالرشاش، يعني هو بعدها الفكرة عالقة براسه إنو بدو يتحمم بالكيلة، ما كان في حياة هونيك، يعني إذا بدو يضهر الواحد يوم الأحد عالوتيل يشرب شي juice أو هيك مش أكثر من هيك، كان في ملل بس كنت عبي وقتي، بس الشغيلة ك خدم وهيك اليد العاملة كانت رخيصة، ف كان عندي 3 شغيلات شي بيتولي المطبخ شي بيغسل وشي بنظف، فيعني إنو بالنسبة للعمال كانت القصة سهلة، بس إنو الحياة الإجتماعية كانت لأ، ما في حياة إجتماعية صراحة، وتعودنا، وبعدين صار عنده زوجي موظفين، وسكنوا معنا يعني صار في هيك أشخاص تهتمي فيهن تلتهي بهيدي الحياة، تعرضنا لسرقة هونيك كمان بس الحلو إنو هونيك كان في نظام عسكري كان الجيش مسيطر هونيك بطريقة كثير جيدة لدرجة إنو نحن كل شي انسرق من عنا لمن صرح عنهن زوجي واكتشفوا قطعة من القطع المسروقة لاحقوا يعني أخذوه ضلن يضربوا فيه لحتى قرّ لمين، منين مشتري هيدي القطعة ووصلوا للجماعة اللي سرقونا بالجبل الثاني المقابل لأننا، ممم، جابوهن، وجابوا كل الإشي اللي كانوا سارقينها واستدعوا زوجي وقالوه يدقق بالموجودات إذا هني هيديولي هني وقلهن "إيه هيديول هني، أنا بدي روح جيب سيارة عشان أنقلهن"، قالوه "الأ مثل ما هني سرقوهن بدهن يحلوهن عاكتافهن ويرجعوا يرجعوا ياهن محلهن"، وفيهن كنباتات [تضحك] وفيهن إشياب بواب حديد وهالإشياب هيدي كلها نتعوا مثل الشاطرين وفوتولنا ياهن على البيت عال Villa حطوها برا بقلب ال Villa حطوا الغراض كلها، وحملوهن [للحرامية] وأخذوهن، فكان في أمان كثير، وكان من المفارقة إنو شعب كثير بحب يتعلم، كثير مش شوي، عندهن مدارس ليلية،

[01:20:41] للموظفين اللي بيشتغلوا بالنهار وما قادرين يروحوا يعملوا جامعات أو مدارس وحتى كان ال gardier اللي عنا، نتطور، كان يجيب معه كتبه هو وقاعد بالليل عم يحرس يراجع دروسه، فكان عندهن هيدا شغف العلم جدا رائع، بقينا هونيك 3 سنين، بعدها جينا علبنان، أكيد أنا بهيدول ال 3 سنين جيت علبنان زيارة ورجعت رحت، ورجعت بعد ثالث سنة، رجعنا رحناعلبنان أساس إنو زيارة ونرجع، وقرر زوجي إنو نبقي بلبنان لأنو شغله صار بحكم عليه إنه يسافر من منطقة لمنطقة ويتركنا نحن، فما أمن إنو نحن نكون لوحنا بهيدي المنطقة، ممم، بلبنان يعين صار في أكثر كمان مسؤولية إنو هو بغيب كم شهر وببجي كم شهر، فصار المسؤولية على عاتقي بالنسبة لرعاية الأولاد، تدبير البيت، ممم، يعني صرنا عم نغير من أجواء لأجواء صراحة، بس أكيدة بين الأهل، بين القراب، قضينا وقت هيك، وبعد فترة من الوقت قرر إنو هو يجي خلص على طول علبنان، لأنو زهق إنو يضل بأفريقيا صرله من هو وأول طلعتته، من أول شبابه يعني، بأفريقيا، فقال خلص أنا بدي إرجع علبنان وكفي حياتي مع عيلتي بلبنان، إجي علبنان وعمل مشروع اشتري أرض كبيرة وعمل مشروع عليها واصتدم بكثير من الإشكالات، تفاجئ بنفسية الناس، تفاجئ بالكذب والخداع تبعلوهن هون، بأفريقيا ما بتحسي بهيدا الشئ، ما قدر إنه ينسجم مع الناس اللي عايشة بلبنان، فبعد سنتين من مكوثه بلبنان قرر إنه يرجع يحاول إنه يفتح بأفريقيا مرة ثانية، ف إتفق هو و 4 أشخاص إنو يروحوا على دولة أفريقية يعملوا دراسة ليفتحوا معمل هونيك، فراح زوجي مع شخصين، الشخص الرابع كان بدو بيعت إبنه قالوله ما في داعي هلق، خيلنا نعمل دراسة ومشوار الجاي بروح إبنك، ومن حسن حظه إنه ما راح هيدا الشب لأنه زوجي ورفقاته وقعت الطيارة فيهن، وتوفى. كانت صدمة صراحة كثير كبيرة هيدا الموت المفاجئ اللي هو منو محضره الواحد، يعني لو مريض الواحد أو شي يعين بكون مهياً، بس إنك تنامي تفريقي إنو وقعت الطيارة، كان جدا صدمة كثير كبيرة ومعاناة وكان أنا كمان صار عندي ولد كمان خامس بلبنان هيدا جنبنا، وكان بعده إبنه عمره لما توفى بيو 5 سنين ونص، وخيو اللي أكبر منه كان عمره 11، وعندي بنت 13، وبنت عمرها 20 وبنت عمرها 19. وكلهن هيديول بدهن مسؤولية جدا كبيرة، وعنا أرض لازم أهتم فيها وأنا ما بعرف فيها للأرض لأنو زوجي ما كان يتعيني بهيدي المواضيع، الإشي الخارجية كلها كان هو يعملها، أنا إهتم فيه وبالأولاد، وهالقصاص، ف، وكن في قروض نحن ماخذينها، قروض مدعومة، وكان في تأمين عيياته بخصوص هيدا القرض، وفتت بنزاع مع البنك، وفتت نزاع مع شركة التأمين،

[01:25:41] معاناة طويلة عريضة بقيت شي 9 أشهر، 10 أشهر معاناة، ويلي كمان بناتي جامعات ببيروت، بدي ظل عليهن، ويلي بدي إرعى الأرض وجبلها كل شي بيختص برعايتها للأرض وللزرع، إصرف عليها، وإصرف على حواش المحصول، وويلي بدي وصل ولادي عالمدارس، بدي درس ولادي، ويلي بدي جهاز أكلاتي، ويلي بدي تابع مشكلة البنك، ويلي بدي تابع شركة التأمين، فكان دمار شامل علي وتعب جدا كبير، وهيديول كلهن مع فقده لزوجي، إنو خسرتة، ف، كانت مرحلة جدا صعبة، كثير قاسية علي كانت، كثير أوقات حس بتعب، بتقل، كأنه جبال على ظهري، حس هيك ظهري عم ينحن من الأعباء القوية اللي عم بتعرضلها، لكن [يدق تليفون]، لكن كنت دايماً شد ظهري إرجع وقول "شدي ظهرك، لازم تكوني قوية لأنو إنت عندك ولاد، لازم تبني قدامهن قوية عشان هني يكونوا قواية، مشان ما يضعفوا بلحظة من اللحظات، لأنو ما عاد عندهن هيدا السند، هيدا العمود القوي اللي يرتكزا عليه اللي هو بيهن، فكثير خطأ إنو هني يشوفوا إمنهم كمان ضعيفة، رح ينهاروا، رح يصير في عندهن خلل بحياتهن، فكننت ضعفي أنا، كل الضعف اللي كنتن أقطع فيه، كنتن أقطع بعفتي، لوحدي، ما حسس ولادي فيه، كرمال هني يقدرنا يكوموا هالحياة، ويكملوا طريقهن بطريقة عبأها أقل، من الإشي اللي بذكرها بس بيهن إستشهد

بس وقعت الطائرة، نحن بيتنا كان ما يفضى، من الصباح من الساعة 9 للساعة 10:30 بالليل يومية يومية العالم كانت تضلها عنا كل الوقت البيت مفتوح، ولادي ما معودين على هيدا الشى وصعوبة فقد بيهن صاروا يهربوا للنوم، يطلعوا يناموا فوق، مشان ما بدهن هيدي نظرة الشفقة، ولاقيينها كثير صعبة عليهن إنو هني فقدوا بيهن بهيدي الطريقة، من المواقف اللي بتذكرها واللي محفورة بوجداني إنو بناتي كان بعز الأزمة لما كانوا بعدهن ما إنتشلوا الضحايا من البحر، ما عرفوا بعد مين اللي ميت، ما عرفوا إذا حدا بدو يطلع طيب، بعد كل الأمور كلياتها ملخبطة وكان البحر هايح بوقتها والغطاسين ما عم يقدرؤا ينزلوا يغطسوا وهالقصص هيدي كلياتها، كان في خضة كبيرة بلبان بخصوص هيدا الموضوع، فيمكن بهيدا الوقت ساقبت إنو ولادي عندهن الFinal، عندهن الFinal exam، بناتي الإثنين الكبار بالجامعة، وبيهن كان يحب إنو هني يطلعوا شي، يتعلموا يعني، فمن ناحية أنا كثير لاقية صعب الفقد، كثير مأداية من هيدا الموضوع، كارثة ونكبة عليي، وبنفس الوقت بدى إنو ولادي كمان رغم كل شي لازم ينجحوا، لازم يكون عندهن مقدرة وعزيمة إنهن ينجحوا حتى يحققوا حلم بيهن. ما بدى شي يكسرهن ويفشلوا ويكون بيهن بمطرح معين حزين لأنو هني ما عملوا شي، فأنا بنتي الكبيرة بوقتها كان لازم تنزل عبيروت عشان تدرس لأنو عندها إمتحان، أنا اللي عملته بوقتها،

[01:30:41] هي كانت تنام يا عند خالتي يا عند بنت عمي، فأنا ما كنت عارفة هي وين رح تروح تنام، لهيك أنا تلفنت لخالتي ولبنت عمي قتلتهن ممنوع يدور التلفزيون عندكن، ولا راديو، ولا أي شي وسيلة للتواصل، بنتي عندها إمتحانات وبنتي لازم تنجح رغم كل شي، لازم تنجح، قال "خلص، وعد ما منحكي بهيدا الموضوع"، فنزلت بنتي درست وعملت الإمتحان تبعلوها، ببعلنوا عال تلفزيون بمرقوا flash إنو كان بوقتها عم يعملوا فحوصات الDNA لأهالي الضحايا لأنو صاروا عم يلاقوا أشلاء، فمن الأسماء اللي وردت إسم بيهن، على الشاشة، فدعري تلفنت لخالتي وبنت عمي قتلتهن إنو تأكد إنو الحج إستشهد، لو سمحتوا، ما حدا يقول لبنتي، خليها تخلص إمتحانها. اللي ما بنسأه إنو بنتي قبل بنهار كان النتيجة طاعة وبأفريقي رفاقها عارفين ومخبرينها، وهي ما قالتلي عشان أنا ما إزعل. يعني هي خيفانة على شعوري، وفوق هيدا عم تدرس لحتى تنجح، وخيفانة إنو أعرف ويزيد حزني أكثر، وأنا بنفس الوقت خيفانة إنو هي تعرف وزعلها يخليها تفشل بالإمتحان، نحن عم نراعي شعور بعض ونحن مش عارفين، إنو هي عارفة ولا أنا عارفة ولا هي عارفة إنو أنا عارفة، فهيدي من المواقف اللي ما بنسأها، والحمدالله الله وفقها بوقتها وجابت بذكر 100/85 بإمتحان الfinal تبعلوها، هيدا بعنبره جدا إنجاز، للحظة، بنت عم تفقد أعلى إنسان بحياتها وعم تمتحن ونجحت، أنا هيدا لألي كان شي فوق الطاقة عم تعمله، وقديش حسيت إنو هي بمطرح معين كأنو ه يعم تهدي هيدا النجاح لبيها. من الإشيا اللي كمان ما بنسأها، إبنى الصغير كان كثير معود إنو هو يروح مع بيو بس يروح عالارض، بس بده يروح عالارض ياخذه معه، وبيو كان على طول بس رفاقته يروحوا وقت الصيد بصطادوا عصافير، كان يجيب عصافير كرمال إبنه الصغير لأنو إبنه الصغير بحب ياكل عصافير، كنت أعملهن العصافير، الشغيلة تتظفهن، أعملهن ياهن ويقعد هو بيو ياكلوهن، اللي أكبر منو لأ ما كان ياكل، ولا حتى إخوانه البنات، هو كان هو بيو ياكلوا عصافير، كان رفيق بيو، وحتى كمان الكبير كان زوجي كثير كثير معلق بالكبير اللي كان عمره 11 سنة ويحس كأنه عنده رجال، يعني يضره معه كأنه رجال، إبنى كان كثير معلق ببيو الكبير، والصغير كمان، فلما إستشهد الحج الكبير كانت صدمة لألو، خسر الصديق الوحيد اللي كان عنده ياه، والصغير، كانوا يقضوا أوقات حلوة هيك يقعدوا يتغاللوا على التخت، هيك يعملوا boxing وقال وهيدا هو ينتصر، وهيدا ينتصر، إشيأ حلوة كانت تمرق معاهن، لما راح بيو، مرة من المرات بكون واقف عم يغسل إيديه عالمغسلة بالحمام وأنا بالغرفة،

[01:35:41] ببسألني بقلي "هلق مين بدو ياخذني على الأرض يا ماما؟ بابا راح، مين بدو ياخذني هلق عالارض؟" حسيت قلبي رح يوقف بس أنا ما كان لازم بين إنو أنا ضعيفة أو إبيكي قدامه، قتلته ماما أنا باخذك عالارض حبيبي، أي وقت بدك أنا باخذك عالارض، تطلع فيي هيك بوقتها بنظرة عتاب وقلبي "حتى لو أخذتيني يا ماما مين بدو يلعبني هونيك؟" هيدي كانت كثير صعبة عليي كثير كثير، إنو أوكيه إنت أخذتيني لهونيك بس مين بدو يلعبني؟، يعني ما حدا بحل محل بيو، قتلته ماما، بروح أنا وإبراهيم، بروح أنا وخيك ومنلعبك يا حبيبي، جربت قد ما فيي ما بين حزني قدامه لأنو الولد بتنطبع بذاكرته كل الأمور هيدي، خاصة إنو أنا كان عمري 8 سنين، كل شي هلق أحداث ما بتذكرها يمكن، بس كل شي أحداث مرت عليي مع أهلي وقت الحرب وكيف إنتقلت إمي وهيك هيدولي بعدهن مطبوعين بوجداني وذاكرتي ما بنسأهن ولا لحظة، لهيك أنا قلت ما لازم أنا إبنى يعيش هيدي المأساة وإسملحه إنه يضعف بمطرح معين، المدرسة بعتولي خبر إنو روح، قعدت أنا والأخصائية النفسية وقالتلي، ومعلمته، قالتلي إنو إبنك عنده مشكلة، قالتلي "إبنك قبل كان يرسم بيت وشمس وشجرة ويرسم ماما وبابا ماسكين إيديهن وهو معهن، ويرسم طائرة، وعصافير، هلق إبنك عم يرسم أسود، بياخذ القلم وبيعمل الصفحة كلها سوداء، هيدا دليل إنو هو عنده مشكلة، فبدك تساعدينا فيها"، فأنا قد ما فيي صرت ساعدهن وطلعتنه من هيدي الحالة، فهو صار بعين شو يعمل؟، يرسم بيت ويرسم طائرة، طائرة لأنو بيو راح بالطيارة، أنا ولا مرة أخذته معي على المقبرة بس بدى زور زوجي، مرة من المرات تعلق عليي "بدي روح معك عالمقبرة" قتلته لأ بلا ما تروح، وتحاليت عليه، وإستنفذت كل الطرق، ما بدى أخذه معي مشان ما يزعل أو يبكي أو ينصدم، وأصر بده يروح، وإخوانه كانوا بدهن يروحوا معي، فأنا شو عملت؟، قلت لأخته الكبيرة

"ماما روجي عالدكانة إنت وبياه، وإشتريله مشتريات كرمال إذا وصل هو عالمقبرة يكون ملتهدى بهيدي الإشيا وما يكون مركز هو على قبر بيو وعلى هيدي الحادثة، فهو راح إشتري الأغراض وجاي مبسوط، وقف حدي هيك، أنا كنت قاعدة عالقبر، فقلي "وين قبر جدو؟" فشرتلته قتلته "هيذا قبر جدو، سلم عليه"، [سألني] "وين قبر عمتو؟"، دلبيته عقير عمته، وقف حدي قلي "وين قبر بابا؟"، قتلته "هيذا قبر بابا"، هوكان عم يحكييني، بس قتلته هيذا قبر بابا، أخذ نفس طويل، شهيق [تشهق]، وقطع نفسه، وهيك فتح عيونيه وصفن بالقبر، وما عاد طلع الزفير، فأنا "ماما"، هيك هزبته، "ماما حبيبي"، تطلع فيني هيك، بقلي "ماما"، قتلته "شو بك يا حبيبي؟" ونزلت دمعتيه، "شو بك يا ماما؟"، قلي "هلق بابا بردان تحت؟"، شو بدك تقوليله طفل بهيدا العمر هكلان هم بيو إذا بردان بالقبر؟

[01:40:41] بدك تتمالكي أعصابك لأقصى درجة، ما بدك تبيني دمعتك قدامه، ولا بدك تبيني حزنك قدامه عشان ما تخوفيه وتصدميه، قديه بدو يكون عندك طاقة جبارة لتقدري تعملي هيذا الشي؟، قتلته "ماما"، قلي "شو؟"، قتلته "إنت بتعرف إنو بابا عنده هلق كوفرلي [duvet cover] أحسن من اللي عنا وبدفيه أكثر من اللي عنا؟"، تطلع هو فيني هيك، كيف كأنو إنت رديتيله روحه، تبسم قلي "عندج يا ماما؟"، قتلته "أكيد يا ماما، أنا متأكدة"، قتلته "بعدين بقلك شغلة؟"، قلي "شو؟"، قتلته "إنت مش كنت تحب العصافير إنت وبابا؟"، قلي "مبلا"، قتلته "مش كان يتعذب ليروح يجبلك ياهن؟"، قلي "إيه"، قتلته "هونيك أحلى بكثير، هونيك بس يخطر على باله العصفور، ما بروح بجيبه للعصفور، بيحي العصفور لعنده، وبيجي قاليينله ياه وخالص، وحاطينله ياه بالصحن بس عشان ياكل، وعنده هونيك شجر شوكولا وشجر بونبون"، وقعدت إحكيه هيدي الإشيا اللي هي إنو بتحاكي فكر الولد، فهون هو مبسط وحس إنو بيو فعلا بأمان هلق ما عم يتعذب ما عم يبرد عنده كل الأكل، فهون قعد هو عادي. هيدي القصص اللي قعدت فيها بعد وفاة زوجي، بقينا بالصعوبات تبعت البنوك، وتبعيت التأمين وكانت كل شي عنا لأنو ماخذين قرض نحن مدعوم، كل الأراضي اللي عنا والبيت كله مرهونين للبنك، فكنت أنا عم ناضل بكل قوتي لحتى إقدر خلص هيذا القرض وحرر الممتلكات اللي عنا والحمدالله الله وفقني وكان عندي محامي كثير قوي، وقف بوج البنك وبوج شركة التأمين وخلص لي كل أموري والحمدالله، وأنا رجعت تابعت الأمور الثانية اللي بتتعلق بنقل الملكية، وكل الصعوبات اللي بتتعلق بهيدي المواضيع، وخلصتها، قطعتها على خير الحمدالله، وكنت بوقتها إنزل ظل عباتي وأنا كنت ساكنة بالجنوب، إنزل لعند بناتي ظل عليهن وإرجع أطلع لأنو ولادي بدي وصلهن الصبح عالمدسة، لازم روح ظل عالارض، كان عندي هيدي المهمات شوي صعبة، وأحيانا كثير كنت أغفل عالطريق أنا ورايحة ومن حظي الحلو إنو الطرقات تكون واسعة، ما في مهوار لأوقع فيه، للحظة إغفل وإرجع فيق، تكون شاحت السيارة شوي فيني، صارت معي عدة مرات، لدرجة إنو بناتي كانوا يخافوا عليي بهيدا الموضوع إنو شي مرة أعمل حادث، بس هو من التعب أغفل أنا وعم سوق، بعدين بعد 3 سنين من هيدول المواضيع كلهن، وصلت لمرحلة إنو هيدي الارض، كل هالتعب اللي عم بتعبه عم يروح للأجور ولمصاريف الارض وهالقصاص هيدي، ما عاد عم يعمل شي income لألي أنا للمدرسة للأولاد أو لحتى مصروف لألنا، كلو عم يروح مصاريف بتتعلق بالمشروع والشغل والموظفين اللي فيه، هون قلت أنا لأ، خلص، أنا لازم ما كمل لازم أنا هيدي الارض أجرها، شو ما طلعي منها، وإنزل وإقعد مع بناتي ببيروت، هيك منجتمتع كلنا العيلة مع بعض، وبدل ما نكون فاتحين بينين منقعد ببيت واحد وبنتبه لأولادي كلهن مع بعض، واللي بيستأجرها للارض هو بيهتم فيها، وهيدا اللي صار، ممم، ونزلت عبيروت وحطيت ولادي بالمدراس وكانت بنتي الثالثة صار لازم، يعني درست آخر سنة وبعدين فاتت جامعة، والحمدالله، بنتي الكبيرة خلصت صيدلة وتزوجت وهلق حامل ورح صير تيتا قريبا، انشالله،

[01:45:41] وبنتي الثانية خلصت ماستر، خلصت أخصائية تغذية وعملت ماستر بالpublic health، وشغلها ماشي حاله تمام، وبنتي الكبيرة كمان بتشتغل وشغلها كثير منيح الحمدالله، وبنتي الثالثة تخرجت إدارة أعمال وعم تشتغل، وبقي عندي هلق الصبيان، صبي عم يعمل إدارة أعمال سنة ثانية، والصغير هلق صار IBac، وإنشالله يا رب هيك بتمنى الله بكرمني فيهن وكون عالقليلة أدبت رسالتي بهيدي الحياة على أكمل وجه. هاي هي مسيرة حياتي، فما بعرف إذا في عندك شي أسئلة، في إشيا بدك تصوي عليها، أنا بكون جاهزة.

ي.أ.: بشركك كثير وبقدر إنك حكيتي كل هيدي القصص بطريقة كثير حلوة وبتسلسل كثير حلو، أنا ما عندي شي أسئلة، إذا إنت بتحبي بعد تضيفي شي أو تعلقي على شي نقطة

ج.د.: [01:47:10] يلي بدي قوله إنو المرأة لما بتأخذ قرار إنو هي ترتبط وتعمل عيلة مطلق مرأة بالحياة، ممكن في ناس بيتوقفوا بالحياة وبتكون حياتهن كثير حلوة، في ناس يمكن بكون في --بفوتوا بمتاهات ومطبات وبفوتوا بمشاكل كثيرة، وما بتكون يمكن الحياة مثل ما كانوا بيتمنوا، بس رسالتي بالحياة هي إنو مش كل شي نحن منقدر نحصل عليه هالدنيا هيدي، لكن الأهم بكل هيدي المواضيع، لما أنا بدي أرتبط وأعمل عيلة، هيدول الأولاد، هي الثمرة اللي قررت إنو إنجبها وتخلق لهيدي الدنيا، حقها تعيش بأمان وما تكون --تترعرع ب --مثل ما بقولوا، لازم تترعرع بكنف أسرة كاملة، يعن المفروض المرأة شو

ما بصير معها، المفروض تضحي كرمال هيدول الأولاد، ليكبروا ويكونوا جيل إيجابي، جيل معطاء، بيعطي لهيدي البلد، لبلده، ويكون شي positive بهيدي الدنيا، ما يصير ولد مشرد ولا عنده مشاكل نفسية ولا إنه يخسر حياته بمطرح معين، فدور الأم جدا كبير، كثير كبير، دور الأهل، الأم والبي، إنو يضلهن هيدول الأولاد حاضنينهن، يحسوهن بالأمان، يتعالوا عن كل المواضيع اللي هني بيقطعوا فيها والأزمات اللي بيمرقوا فيها، كرمال هيدول الأولاد ما ذنبنهن، ما إجوا عالحياء لحتى يكونوا مظلومين بمطرح معين، فأنا رسالتي لكل أم إنو دورك بالحياء إنك إنت تضحي أحيانا يمكن بمطرح معينة ما يكون عندك حياتك إنت الخاصة فيها، بس الشي اللي بعزيكي واللي بخليكي تفرحي وتغادري هيدي الدنيا إنك إنت عم تأدي رسالة جدا عظيمة، إنت فيها على المحك بين إنك تكوني إنت نجحتي بهيدي الرسالة، أو إنك إنت فشلتني فشل ذريع، وينصح كل أم كل أم إنو تناضل بكل قوتها كرمال ولادها وما تتركهن ولا للحظة ولا للحظة وانشالله الله بعوضها لما بنتشوفهن كبروا وأنجزوا الحلم اللي هي بدها ياه، اللي كانت تحلم فيه، وإنو يكونوا ولادها صالحين، ويكونوا أعضاء ناجحين بالحياء، وأعضاء مثمرين بفيديو غير هن ويبستفيدوا من تجاربهن بالحياء، هيدي رسالتي لكل إم ولكل أب، حرام ولادكن تظلموهن وتتركوهن، لازم لأخر نفس بعمركن تضلكن حدهن.

ي.أ.: شكرا كثير إلك، أنا بتشكرك كثير مني ومن فريق ورشة المعارف

ج.د.: [01:51:03] _حبيبتي _____ تسلميلي يا قلبي، تسلميلي، الله يحميكن، وبتنالكن التوفيق يا رب.

[إنهاء التسجيل]